

# KAVULAMYA KA KUMUPASHI



Pano Naketekela, pano Naketekela,  
Byonse byakonsheka, pano Naketekela;  
Pano Naketekela, pano Naketekela,  
Byonse byakonsheka, pano Naketekela.

<sup>2</sup> Twayai tutwajijile kwimana pa kakimye kacheche pano na mambo a Kyambo kya Nkambo. Twayai tuzhikule mu Amosi, ngauzhi Amosi, kyapitala kyabu 3, kutatwila pa veeleshi wabu 1.

<sup>3</sup> Nasaka kusachila Nyenga Juanita ne Anna Jeanne kabiji ne Nyenga Moore, pa oa makolasi a nyimbo wawama bingi. Wajikumbwezhamo, byo Najikwikala popa na kuteleka konka. Amiwa nalangulukilenga, kimye kyo bajinga ne atweba, na kwimba mu kipekenyi, Mulongo Jack ne Amiwa twaambilenga, aba bansongwakazhi bajinga bansongwakazhi bacheche, bajinga sikisitiini pacheche, nangwa nobe byonkabyo, nsongwakazhi. Pano, Nalanguluka mba, Nyenga Anna Jeanne uji na baana faivi, kabiji Nyenga Juanita uji—uji na . . . inanja baana babiji. Kabiji tuji bingi pepi na kuzhika kwa juba, banabakazhi, kukila byo twajinga kyokya kimye, pepi nobe myaka sikisitiini yapitapo. Kechi ntukabanda ne, tukabukila ku bushiya, akya kimye kyawama bingi.

<sup>4</sup> Pano mu Amos kyapitala kyabu 3, twayai tutange.

*Umwai bino byambo byaamba YEHOBA na mambo a anweba, Anweba baana ba Isalela, kyo kisaka kyonse kyo Nafumishe . . . mu ntanda ya Ijipita, kwamba mba,*

*Anweba yenu yenka ye Nayuka . . . ba mu bisaka byonse bya pano pantanda: onkao mambo amiwa nkemukabisha anweba na mambo abubi . . . bwenu bonse.*

*Bushe bantu babiji bakonsha kwendela pamo byepi, kwakubula kumvwang'ana?*

*Bokwe wimba mungye kasa akyangye kukwata nyama nyi? ne mwaana bokwe uji mu jiyengo, naye ubuluma kwakubula kujapo kintu nyi?*

*Nanchi kang'onyi kapona panshi, kwakubula kufwa mu kitewanyani? bushe mukomba uvubuka, pantanda kwa kubula kunyatamo kintu nyi?*

*Bantu babula kuchina byo bemba ntolompita, ya kwibajimuna mu muzhi nyi? bya malwa bifikila muzhi, kwa kubula YEHOBA kwi byuba nyi?*

*Kine aye Yehoba...kechi uba kintu ne, kana wasolwela jimo byafyamika byanji ku bakalume banji bangauzhi.*

*Bokwe wa imba, ng'anyi usakubula kuchina? aye Yehoba...wa amba, nanchi ng'anyi wakonsha kukana kwaula?*

Twayai tukunyike mitwe yetu.

<sup>5</sup> Nkambo Yesu, lekai kikye, Kyambo Kyenu, Nkambo, lekai bufuku buno twikale na lumvwang'ano lwa bupopweshi mu kikye kibese. Twalomba, Nkambo, amba Anweba musakwitupa kishina kya mutwe, amba tufume paapo, kabiji kilete munema Kwianweba. Tupeshai byo tubena kupembelela, Nkambo, bufuku buno, ponka pa Kyambo Kyenu. Bukai bakolwa ne bamanyikwa. Mpulushai balubilamo. Mpanai bulume ku bakoka, Nkambo, abo bakokelela, byonse pamo ku mubiji ne ku mupashi. Kabiji tupai kwitulwilwa kukatampe kwa Kyeenyi Kyenu, mambo twikipuzha mu Jizhina ja Yesu. Amena.

<sup>6</sup> Nakeba kutola mutwe, kukikye, bufuku buno: *Kavulamya ka Kumupashi.*

<sup>7</sup> Kechi mulubeko ne, keesha, ke milombelo ya bakolwa keesha. Twaketekela Nkambo kuuba bikatampe, keesha mabaanga pa tuu koloko, ako...inge twatatula mpwijilo yetu. Nsongwalume ukekala kuno na kupana bitupa bya milombelo. Kabiji muntu yense ukalombelelwa ukeba kulombelelwa. Kabiji tubena kuketekela kwikala na kimye kyawama bingi, keesha, mwi Nkambo.

<sup>8</sup> Pano anweba bantu muji muno, benyi bafuma mu tauni ungi. Vulukai, muji byawama, bipwilo bya Mamboawama onse biji mu muzhi. Anweba mwatambulwilwa ku byonse bye.

<sup>9</sup> Najikwisambanga na umo kafunga ye nyingila nanji, pangye, popo ajikwiyatu, Mulongo Jackson, kala wajinga wa mu kipwilo kya Methodist, muzhi umo nangwa ibiji kunyuma yetu.

<sup>10</sup> Kabiji baanga baji muno bengijila pamo na tabbanako, twayai tumone maboko enu, konse konse. Ami, Amiwa kine—kine njina lusekelo lwa kwikala nenu kuno. Ino yo mbung'eno iji bingi pepi yo Natanwako ku Indiana mu kimye kicheche. Amiwa mbena kulanguluka kubwela jibiji, katatakatu, kabiji ne kushimika tete mwakupwijila na mambo aoo Matolompita sebeni apelako, inge Nkambo waswa.

<sup>11</sup> Nanchi, pano, bino vulukai keesha. Kechi mulubeko ne, keesha pa tuu koloko. Kabiji, pano, mpwijilo yetu ikalondelapo ikatatula mulungu ubena kwiya, mu Tampa, Florida.

<sup>12</sup> Pano Mbena kukeba kwamba pa: *Kuvulamako ka Kumu-... Kumupashi.*

<sup>13</sup> Pano, awe mulongo mucheche ye tubena kwambapo, Amosi, pa kakimye kacheche, pakuuba mba twaale kitendekesho kyetu

kasa tukyangye kufika ku kibaaba ne. Akye kyajinga kimye kya bunoshi bukatampe bingi mu Samaliya. Isalela wajinga bingi na bunoshi. Balondejile bingi ntanda kabiji bunoshi bwabo bwakomene.

<sup>14</sup> Kechi kimye kyonse bunoshi ke kiyukilo kya mapesho a bumupashi ne, bino bimye bimo kikala mwapusanako. Bantu balanguluka mba inge mwaikala na bintu byavula bya ku mubiji, kimweshwa mba Lesa ubena kwimupesha. Akyo kechi kyakine ne. Bimye bimo kikala mu musango mukwabo.

<sup>15</sup> Bino twatana mba, aye, kechi twayuka byavula pa yuwe mulongo mucheche ne. Aye, kechi tujipo na jishimikila ne, ko afumine. Twayuka mba aye, mwaila Kinembelo papo, aye wajinga kalama wa jitanga, bino Lesa wamwimenye.

<sup>16</sup> Nalanguluka kumona, juba jimo jajinga jakaba mu Samaliya kokwa, wajinga umo wa mizhi ikatampe muntanda amo bakang'enda mo bamonanga bilengwa na lesa mujoja juba. Wajinga uji pamo nobe biji, twakonsha kwamba mba, Miami, nangwa—nangwa Hollywood, Los Angeles, mampuzha amo aji muyewa musango, mpuzha imo ya bakang'enda. Kabiji twakonsha kulanguluka kumumona aye. Aye kechi waikalepo mu yewa muzhi ne. Bino, aye wajinga na Kyambo kya Nkambo, aye waishilenga mu yuwe muzhi mukatampe amo bubi mo bwalumbikilwe ku mbaji yonse ibiji. Abo bamingilo bafumineko ku Kyambo kya Lesa, kabiji kechi bajinga na ngauzhi pa myaka yavula ne.

<sup>17</sup> Kabiji nanchi yuwe mulongo mucheche, byo akajijile peulu ya katumba, kyajinga nobe lubaji lwa kabeta kabuyeke bwa Samaliya, Nakonsha kufwanyikizha kumumona, juba jakaba jasamine bingi, ne myevu yanji yamvwi mu kilungi kyanji, kabiji ne meso anji acheche a kepa, kabiji ne wanji mucheche, mutwe wakipala wabembejilenga, byo atajile mu yewa muzhi. Kabiji meso anji akepele. Aye kechi watajilenga pa kyamwenenga bakang'enda ne, kuya mu muzhi na kumona bya buya bwaji. Aye watajile wamona mwekelo ya yewa muzhi byo aikele, muzhi ao kimye kimo wajinga muzhi wakwa Lesa, kabiji pano wafikile mu bubipisho buji byobya. Kechi kyakukumya ne. . .

<sup>18</sup> Awe mucheche, mulunda wabula kuyukanyikwa wajinga Amosi ngauzhi. Kabiji pano kechi twayuka byavula pe aye ne. Atweba kechi twayuka ko afumine ne. Bangauzhi javula byo beya kumweka, babula kuyukanyikwa, bafumapo mu musangotu umo. Kechi twayuka ne kobafumina, ne kobaya, kechi kyayukanyikwa bwikalo bwabo bwakala ne. Lesa wi bemanyatu. Aye kechi wajinga na kyakumutajila ne, bino wajinga na ABYO BYOBYAAMBA AYE NKAMBO. Akyo kyokine kintu kyo Namona. Onkao mambo, wayishile ku Samaliya na kutatula kipekenyi kyanji. Naketekela mba kechi wajingapo na umo wakukwatakana nanji ne. Aye kechi wajinga

na kitupa kya lumvwang'ano lwa bupopweshi kufuma ku dinominesheni ne. Aye kechi wajinga na tuyukilo twakumweshi jibumba ko afumina ne. Kabiji, bino, wajinga na kintu kimo, aye wajinga na Kyambo kya Nkambo kya yewa muzhi.

<sup>19</sup> Kabiji Nakumya, inge twakonsha kumusenda Amosi, leelo, kufika ku kimye kyetu, Nakumya kana bakonsha kumutambula mu muzhi wetu leelo. Nakumya kana twakonsha ku mutambula, nangwa kana twakonsha kumuuba byonka byo bamubile. Twatana mizhi yetu musangotu umo wabubole. Kabiji twatana kuuba mba bubi bwakibayatu mu bantu, byonka byo kyajinga kyokya kimye. Kabiji Aniwa nakumya, inge awe mucheche, muntu wabula kuyukanyikwa, usakutampa byepi kikye kipekenyi? Byepi, kwepi koabena kuya nakutapila? Kipwilo ka kyo abena kuyako, nangwa ng'anyi wakwikala nanji mu lumvwang'ano? Aye kechi wajingapo na kimo kya kumweshi koafumine ne, aye kechi wajingapo na kintu nangwa kimo ne kanatu ABYO BYOBYAAMBA AYE NKAMBO kya yewa muzhi.

<sup>20</sup> Wibataine baji mu bubole bwabaya kabiji bajinga mu bubipisho bwabaya bingi, kyajinga kimye kyabaya bingi. Banabakazhi mu yewa muzhi baikele pepi nobe byonka byo baji mu United States. Baikele ke bubole. Bintu byonse Lesa byo aketekejile mwi abo, byaile mujishinda jikwabo. Kabiji—kabiji twatana mba kyajinga kifulo kikatampe bingi apo po bajinga na bya kuzha mu mukwakwa, banabakazhi bajinga na mvwajilo yabo ya mulekese, kabiji ne bikwabotu, nobe mazha a kwenda na kuvula. Mambo, akya kyajinga ke kyakutambisha mu ooa moba, pakino kimye ke pajuba pajuba. Lekaitu kwikale lubesha wakaba, kechi wafwainwa kuya kuji byakutamba ne. Byonse bijitu mu mukwakwa, konse konse, nangwa byonkabyo. Kimulenge buvu anweba banabakazhi, kuuba kintu kiji byobyoy! Kechi wiumvwina buvu obewa mwine ne?

<sup>21</sup> Kabiji pano—kabiji pano Naambile kyokyo ku mwanamukazhi kuno, kechi papita kimye kyabaya ne, kabiji waambile mba, “Kika,” waambile mba, “Mulongo Branham,” waambile mba, “akyo, akyo—akyo kijitu pamo nobe banabakazhi bashala.”

<sup>22</sup> Naambile mba, “Bino atweba kechi twafwainwa kuba nobe bantu bashala ne. Atweba twaikala bapusanako. Atweba twi—byubilo byapusanako.”

<sup>23</sup> Kyavulula mwanamukazhi, waambile mba, “Kyawama, Mulongo Branham,” mukwabo waambile mba, “Amiwa—Amiwa—Amiwa kechi vwala totwa tuputula ne.” Waambile mba, “Navwala matoloshi.”

<sup>24</sup> Naambile mba, “Akyo kyakila mukutama.” Uu! “Lesa waambile mba, ‘Ke kyabunya,’ ku meso Anji, ‘mwanamukazhi kumvwala kyakumvwala kyapashako kya mwanamulume.’” Aboyo kine ibyo.

Umo waambile mba, “Kyawama, kechi balengapo byakumvwala bikwabo ne.”

“Bakiji babena kulenga mashinyi akutungilako kabiji ne bikwabotu bintu.”

<sup>25</sup> Kechi kujipo mwakunyemena ne. Kijitu ku kyokya kiji mu muchima. Abo byo kimweha. Ki—kimweshwa akyo kine.

<sup>26</sup> Kabiji pano twatana mba, mu uno muzhi, kyaikala ke kya bubipisho. Basapwishi baji na moyo kwambapo kiji kyonse pa kikye. Kabiji, bino bajinga na mucheche, awe mulongo mucheche wakala waishilenga kufumina pa katumbatumba, waishilenga na kwibabuula mba ABYO BYOBYAAMBA AYE NKAMBO, “Tokeshai kikye kintu, inge ne mubena kuya mu buzha.” Kabiji aye waikajile na bumi pakuuba mba amone moba akufikizhiwa kwa bungauzhi bwanji. Aye waawile mu moba akwa Yeleboma wa Bubiji, ao wajingatu wabula kuyukanyikwa, nangwa byonkabyo; aye—aye wanekeleko byaalo bikwabo. Kabiji—kabiji awe Amosi mucheche waawile ne kwibabula, aye waambile mba, “Awa yeka Lesa ye mwaamba mba ye twingijila, Aye ukemonauna.” Kabiji Aye wikyubile.

<sup>27</sup> Kabiji inge jiji jani jafwainwa kwikala muno bufuku buno, mu . . . mu Birmingham, jafwainwa kwamba kintutu kimo ku bipwilo. “Awa yeka Lesa ye mwaamba mba ye twingijila, ukemonauna juba jimo.” Amiwa kechi mbena kwamba ku jije jibumba jiji kuno ne. Ao matepu aya mwaya ntanda. Pano, vulukai, akyo kya kine.

<sup>28</sup> Nanchi wataine mba, byo aishile mu muzhi, amba aye . . . byonse bye bintu, Nakumya kana wikyumvwine byepi pakumona bubole bwa bantu ba kwa Lesa, abo bo atuminweko.

<sup>29</sup> Nakumya kana twakonsha ku mutambulwila pakino kimye nyi? Inge wakonsha kwiya, twakonsha—twakonsha kukwatakana nanji nyi? Bushe twakonsha kumupa—buwame bwetu nyi? Bushe twakonsha kumuteyako maana nyi? Bushe twakonsha kulapila inge witubuujile mba twafwainwa kubwela ku Kyambo kya Nkambo kabiji ne kuubila mujishinda Nkambo ju aambijilemo mba tuube?

<sup>30</sup> Nakumya kana banyenga yetu bakonsha kuuba byepi na suki yabo yakwachika? Bushe bakonsha kuleka suki yabo yakoma ne jikwabo, inge Amosi wayishile? Aye wakonsha kwi kisapwila, kabiji Mbena kwimubula kyokyo, mambo akyo ke Kyambo kya Nkambo.

<sup>31</sup> Na—Nakumya inge byetu—inge bije byetu byabikapo bakwasho, basongola jisatu nangwa bimye foolo, kabiji—kabiji ne bikwabotu bya byobyoy, kabiji akwe ne kwikala bakwasho, Nakumya kana abye bintu byonse, Nakumya kana wakonsha kuuba byepi ku mwanamulume uswisha mukazhi wani kumvwala tuputula ne kulupuka kuya pa mukwakwa, kabiji ne kukwepa lubaza, kulupaka pangye ya lubaza, inge

mwanamulume ubena kupita kwipi? Nakumya kana wakonsha kwamba ka ku mwanamulume wayewa musango?

<sup>32</sup> Aye kine wakonsha kwibikajipila na byonse bijin mwin aye, mambo aye wajinga na ABYO BYOBYAAMBWA AYE NKAMBO, kabiji aye kechi wakonsha kubapo kintu kikwabo ne kanatu kyonka kya. Aye wibataine munjoja juba na kikola kyatama, kavulama ka kumupashi, kabiji abyo kine kyo tuji nakyolelo.

<sup>33</sup> Pano, wayukile byepi bintu bikamweka? Amosi wayukile byepi? Patanshi, aye wajinga ngauzhi. Kabiji, kyalondelapo, wayukile kupichila mu kikola lukatazho byo lwajinga, kabiji aye wayukile bintu byakonsha kufumamo.

<sup>34</sup> Inge dokotala watala pa musongo kabiji wamona mba awa musongo wabaya, aye wayuka mba kafwako kijipo ne kanatu lufu. Abyo byobyoka, kanatu Lesa waubapo kintu kimo pakikye.

<sup>35</sup> Kyawama, inge watala pa muzhi, kabiji watala pa bantu, watala pa kipwilo, kabiji watala pa bantu abo baji kwalepa bingi na Lesa, kechi kuji kijipo ne kana kupesapesa, “Bubi! ‘Kabiji fweto ya bundengamambo lo lufu.’ Kibena kufwa.” Kupesapesa kushinikisha kintu byokiji. Mwamona, umvwe bantu bafuma kwi Lesa kechi bakonsha kuteleka ku Kyambo ne, kechi baji na kilaka kya Kyambo ne, nanchi kuji kupesapesa kumo pa kikye, “Awa mweo ulenga mambo, awa mweo ukafwa.’ Kubula luketekelo ku kakwabanya kufuma kwi Lesa.” Abyo kine ibyo.

<sup>36</sup> Amba, aye wayukile kikola byo kyajinga, bifuminamo byo byajinga, byo amwene kikola kya—kya bubu mu muzhi.

<sup>37</sup> Pano, ako kavulama, twabulwa mba kiji—kiji... kikufikizha pa kifulo kyakubula kwiyuka obewa mwine. Pano, ke kintu kibula kumwekamweka. Kechi kimweka bimye byavula ne, bino kilengela ke kubazhimuka. Ke muntu umo wabula kwiyuka byo aaji. Mwikitana kufuma ku mankondo, bimye bimo, bashilikale bikitambula. Bimye bimo bantu bikitambula. Kintu kikwabo kilengela ke, kusakamana. Kusakamana kukekilengela.

<sup>38</sup> Kusakamana kechi muji bulume, nangwa pachechetu ne. Ee, anweba—anweba—anweba fumyaipo kusakamana, ne kuswa lwitabilo.

<sup>39</sup> Muntu umo waambile mba, “Kyawama, pano, ibyepi umvwe bakuloza lukeelo kelo, kechi wakonsha kutako muchima ne?”

Naambile mba, “Ine, kechi mulanguluke byobyolelo.”

“Kika?”

Naambile mba, “Kusakamana kechin kwakonsha kubapo kintu kimo ne kanatu kubailako.”

“Kyawama, ng’anyi buwame bo kisakuuba kwikala na lwitabilo?”

Naambile mba, “Kyakonsha kupokolola.” Kabiji abyoye, mwamona.

<sup>40</sup> Nanchi kusakamana kechi kuji na bulume ne, nangwa pachechetu ne, pakuuba lwitabilo luji na bulume. Ketekelaitu!

Pano kusakama kimye kimo kokulengela.

<sup>41</sup> Kabiji kintu kikwabo kilengela mba kikaleko mu bantu, ke mambo akwikala pakachi ka milanguluko. Abyo byonse bilengela kavulamyā. Kabiji kikulengela obewa kufika pa kifulo apo obewa—obewa, kine, byo wauba, wavulang’ana milanguluko yobe. Obewa walubilamo milanguluko yobe. Obewa kechi wakonsha kuuba. . . Obewa kechi wayuka byo uji ne. Obewa kuuba wiyuka obewa mwine ne. Wakonsha kwenda kuzhokoloka, kuja ne bintu byonse, bino, nangwa byonkabyo, kechi wakonsha kwimweshā obewa mwine ne. Anweba mwafunda masukuulu, mwafwaonwa kuuba. . . kufunda kumo nkumuji nako, bino kechi mwayuka kokwafumine ne, kechi mwiyuuka byo muji ne, ng’anyi lubaji lo muji nalo. Ako ko kavulamyā, nanchi byo twabulwa.

<sup>42</sup> Twayukanyikwa na bisemi byetu, mu buno bumi bwa bu muntu, monka mu masongola. Kabiji na bakazhi betu, twasongola, kabiji ne kisemi kyetu kyayukanyikilwa na kukwatakana kwa—kwa—kwa masongola etu. Kabiji pano, byepi byakulangulukapo, ibyepi inge kikye kintu kyatama kyakumwekela kabiji obewa wakakalwa kuvuluka wakusongwele, mukazhi obe ye ng’anyi, bang’anyi baana bobē, bashobe ne bainobe bo bang’anyi, bena kikalakulo benu bang’anyi? Akyo kyakonsha kwikala ke—ke kintu kyatama.

<sup>43</sup> Nanchi twayukanyikwa, ne jikwabo, twimweshā atweba bene mu mutundu wa muntu, pakwikala na maana ne—ne kwikala bapusanako ku bumi bwa banyama. Nyama kechi wakonsha kulanguluka ne, aye uyatu na kutangijilwa na kyongyo. Aye kechi uji na mweo ne. Kabiji, bino, twi bumi bwa nyama. Kaki kitupusanyako. . . Atweba twi banyama bamusha baana ku mabele, pano kika. . . Awa nyama wamusha baana ku mabele ke nyama uji na mashi-akaba, kabiji tuji mu musango wa bu nyama. Pano kika kitulengela kwikala bapusanako, atweba twayukanyikwa kwikala na mweo, ne ndangulukilo itubuula byawama ne byatama.

<sup>44</sup> Pano kuji kifulo, inge watambula kako kavulamyā, wafwainwa kwikala nobe Nebukaneza, byo kyajinga, ao witumbijikile ayemwine kimye kimo, kabiji Lesa wamulekele kulanguluka nobe nyama. Kabiji waikēle mungyetu ne—ne kuja nsono nobe ng’ombe. Kabiji—kabiji yanji—suki yanji ya komene pa mubiji wanji, nobe mayona ampungu, kabiji waikēle ke muchima wa lukinyama mwi aye. Mwamona? Aka kajinga kavulamyā, mambo walubilemo kuuba mba wajinga mfumu. Aye walubilemo amba wajinga muntu. Kabiji aye wilangulukile

mba wajinga nyama, nanchi wamwesheshenga byubilo nobe nyama, mambo walubilemo mba wajinga muntu.

<sup>45</sup> Akyo ke kintu kyapela bingi, leelo. Kabiji tulubako, kimye kimo, biji kipwilo kya Bwinakilishitu. Tumwesa byubilo bya muntanda. Akyo kimwesa mba tuji na kavulamyka ka bumupashi, mambo akuuba mba kechi uba byubilo bya Bwinakilishitu ne. Uba byubilo nobe bya muntanda. Anweba mutambula muchima wa muntanda, kabiji kyo kilengela kikye.

<sup>46</sup> Apo atweba—atweba twatana kuuba mba Isalela wimwesheshe, wimwesheshe ku ntanda, kabiji waponejile mu bibyde byatama. Kabiji awe ngauzhi watuminwe kuuba mba ebafumye mu kikye, inge wakonsha, kabiji ne kwibabuula. Lesa, monka mu bupe Bwanji, wasalulwile Isalela kufuma ku byonse bisemi byashala panopantanda. Lusa lo lwaubile byobyo. Aye wibapele kusalulula mantanda. Aye wibapele manzubo o babujile kushimika. Lesa ye waubile kyokyo, wibasalulwile. Aye wibapele majimi ao obabujile kupota. Aye—Aye wibapele, Aye wibapele kajo kobabujile kubyala ne. Aye wibapele mishima yo babujile kupoya. Aye wibapele lushijilo lo babujile kushinda ne. Aye wibapele lusa lwabujilwe kwi bafwainwa. Lesa waubile kyokyo konka ku bupe Bwanji bwa bantu banji, Isalela, basalululwa Banji, Banji batemwikwa.

<sup>47</sup> Kabiji Aye waambile mba, mu Baibolo, “Wamutaine mu bujimi, nobe nsongwakazhi wa mucheche waikala pa mashi anji mwine, kabiji Aye wamomvwele kabiji wamutokeshe, kabiji ne byo Aubile. Bino panyuma Lesa wamwesa lonse lwe lusa kwi aye, kabiji waikale munoshi,” aye uji na kavulamyka, kavulamyka, “kabiji walubileko byonse bye bintu ko byafumina.”

<sup>48</sup> Naketekela mba akye kyo kipikichala kya U.S.A., 1964. Kibena kumanama na kikola kimo. Atweba twi bipwilo bikatampe bingi. Atweba twi bikatampe, bantu babulume. Atweba twavula kubalwa mamilyoni, kabiji twalubako abye bintu kobyafulumina.

<sup>49</sup> Bajinga na musango watama na bibye. Panyuma Lesa waikala wawama kwi abo, kabiji ne kwibaleta kufuma monse mu byaalo bya batunshi, kabiji wibalengele kwikala bantu ba abanwako, wibabenye abo kwikala ke Banji mwine. Aye waambile mba, “Aye watolele musapi kufuma mu kyaalo kikwabo kabiji ne kwikibyaala mukyaalo kikwabo, kabiji Aye wikijimbile ne kwikilengela kyapanga bipangwa ne kusemununa, bino awa musapi walubileko kwafumine oa mapesho.”

<sup>50</sup> Nanchi byo biji bantu bakwa Lesa, mu ano mooba apelako, balubako lushimuno lwa kwikala Bwinakilishitu byo kyalumbulula. Byokiji ne jikwabo, ako kavulamyka kaiya pa bantu. Kechi bakonsha kwimwesa abo bene ne.



51 Abo, balubileko pa byonse Bye. Balubileko buzhile Bwanji. Balubileko mizhilo Yanji. Banabakazhi baikelenga nobe banabakazhi bashala.

52 Kipwilo kya Lesa ne bantu Banji kimye kyonse baikala, “Bantu baabanwa, ke—ke bantu baitwa, bantu bapusanako, kyaalo kyazhila, ke bung’anga bwa bufumu; ne kulambula bitapisho bya bumupashi kwi Lesa, bipangwa bya pakanwa byabo, ne kupana lutotelo ku Jizhina Janji.” Lesa waichile Kipwilo Kyanji ne kwi Kyabanya kufuma muntanda, na mambo akyonkakyu kintu. Kabiji Aye wamupele mizhilo, kabiji Aye, Akyo, kyafwainwa kwikala kyazhila. Aye waambile mba, “Amiwa ne wazhila, kabiji ne anweba mwafwainwa kwikala bazhila, kabiji kwakubula buzhile kafwako muntu ukamona aye Nkambo ne.” Lesa ye waambile byobyoye, Ayemwine.

53 Kabiji Aye waichile baabo bantu kwikala bantu bamusango yuwe, bino abo balubileko pa kikyeyo. Abo balubileko mizhilo Yanji, kabiji balubileko byubilo byabo byawama. Banabakazhi bajinga mu mukwakwa, banabakazhi bena Isalela momwa, muntu yense waketekejile kwi—kwimitwa na Mupashi Wazhila, mu kuleta Mesiyasa, kabiji ne kumwasha byobyoye byubilo. Byubilo byabo byajinga byakatazha.

54 Nasaka kwimana pa kamineti kamo, ne kwamba mba kikijitu kintu kimo mukachi ka bantu betu, leelo, aba beetela abo bene mba Benakilishitu. Byubilo byabo, inge mwakonsha kuvulukatu!

55 Kimye kimo, mu Kabeta ka bulenge. Natangile jishimikila kufuma kukwe, kimye kyo baikalanga na bazha. Bebasendanga boba bantu ne kwibapotesha pa kisakane, nobe byonka byo kyubiwa na motoka waingilapo kala. Kabiji pano kwajinga upota, musulu, waiyanga na kusenda booba bazha ne kwibapotolweshwa, pamo nobe byo mwafwainwa kuuba na motoka.

56 Kabiji aba bazha bajinga kwalepa na kyaalo kyabo. Bafumine ku Africa. Aba Maboers bebakwatanga, ne kwibaleta kuno ku makuji, kabiji bebulula kwibaleta mu United States ne kwi bapotolweshwa buzha, kufuma ku Jamaica ne mwazhokoloka.

57 Pano twatana kuuba mba aba bantu bajinga na bulanda. Bebasendele ku muzhi wabo. Bebasendele ku balwanyo, kabiji bajinga babulanda. Abo kechi bakamonapo balume baabo jibiji ne, nangwa bakazhi baabo jibiji, bashabo ne bainabo, baana baabo. Abo kinetu bajinga... Bebasuminenga, na bikote, pakuuba mba bengile, mambo bajinga bantu babulanda.

58 Kabiji juba jimo, musulu umo waishile ku bujimi bwa bichi, aye wamwene jibumba ja bazha baingijilenga. Kabiji aye—aye

waile monka na kwipuzha mwinabo, ne kwamba mba, “Baanga bazha bo uji nabo?”

Waambile mba, “Pepi nobe aduleendi.”

Waambile mba, “Mujipo na bamo bakupotesha nangwa kupipuzhanya?”

Aye waambile mba, “Ee mwane.”

Waambile mba, “Lekai nebamone.”

<sup>59</sup> Kabiji walupukile kuya mu bujimi na kwibamona, kabiji wibamwene kasa babena kwibapuma. Kabiji pakupitapo kimye, wamwene umo mwananyike mwanamulume ye babujilenga kupuma. Aye walupwile kakuji kanji ne mubanga; kechi bamupuminenga ne. Nanchi musulu waambile mba, “Nafwainwa kutemwa kupota yewa muzha.”

Kabiji aye waambile mba, “Bino ao kechi wakupotesha ne.”

<sup>60</sup> Aye waambile mba, “Kyawama, kika kyapusanako nayewa muzha?” Waambile mba, “Bushe awa muzha ye mukulumpe pa bakwabo bonse nyi?”

Aye waambile mba, “Ine, aye ke muzhatu.”

Aye waambile mba, “Kyawama, kape mu mujisha byapusanako.”

Aye waambile mba, “Ine, aye ujilatu pamo na bakwabo bonse bazha bashala.”

<sup>61</sup> Aye waambile mba, “Kyawama, kika kyamulengela kwikala bapusanako na bonse bazha?”

<sup>62</sup> Aye waambile mba, “Kyawama, akye ne Amiwa nakuminyenga, ne apo, pa kimye kyabaya. Bino juba jimo Nafunjile, mba, mu kyaalo kyanji ko afumine, bashanji ke bamfumu ba mukoka yense. Kabiji nangwa ekale mwenyi, kwalepa na ku muzhi, nangwa byonkabyo aye wayuka mba aye ye mwaana wa mfumu, kabiji aye—aye uba ngubilo nobe mwaana wa mfumu.”

<sup>63</sup> Nalangulukile mba, “Bino, mba, inge mu Negro wafuma ku Africa, kabiji wayukile mba bashanji bajinga bena mukoka ne ba mfumu ba mukoka, pano kyakonsha kuuba byepi ku Mwinakilishitu wasemwa jibiji, mwanamulume nangwa mwanamukazhi, amba Taata wetu ye Mfumu wa Mwiulu mu Lukumo!” Twafwainwa kuuba ngubilo nobe banabalume ne babakazhi bena Kilishitu. Twafwainwa kuuba ngubilo nobe abo, kuvwala nobe abo, kwamba nobe abo, kwikala nobe abo. Nangwa atweba twi benyi, nangwa byonkabyo twi baana ba Mfumu. Amena.

<sup>64</sup> Byubilo byetu, byubilo bya kwitwibwezha panyuma mu ano moba otubena kwikalamo! Isalela waponejile mu lukatazho lumo kabiji ne abo baikela mu byubilo byatama. Balubileko mizhilo ya yakwa Lesa, “Kechi ukobe bukende ne, kabiji

kechi ukangate mukazhi wamukwenu ne,” ne bikwabotu. Abo balubileko yoyo mizhilo. Abo—abo—abo kechi be ikebelenga ne. Kabiji abo—abo bakebelenga ku—kwikala nobe ntanda yonse, byonka biji kipwilo leelo.

<sup>65</sup> Kimye kimo, Isalela, byo batatwile, bakebelenga kwikala na mfumu. Samwela wibabujile, ngauzhi ao watuminwe kwi abo, aye waambile mba, “Bushe Amiwa ne mubuulapo kintu kimo mu Jizhina ja Nkambo kanatu kyafikizhiwa?”

Baambile mba, “Ine, kechi wikyuubapo ne.”

<sup>66</sup> “Bushe Amiwa ne mulombapo kajo ne mali, mali enu, ne ao, pakuuba mba ngikelemo?”

<sup>67</sup> “Ine, kechi waubapo kyokyo ne. Obewa kechi witubuujiilepo kintu nangwa kimo ne, Samwela, kana kyafikizhiwe. Kabiji obewa kechi wakipuzhapo mali etu ne, na mambo a bwikalo bobo. Bino, nangwa byonkabyo, tubena kukeba mfumu, nangwa byonkabyo.”

<sup>68</sup> Lesa waambile kwi Samwela mba, “Baleke bekale nanji. Abo kechi bakukana obewa ne; bakana Amiwa.”

<sup>69</sup> Isalela watwelele mu musango umu pa kyokya kimye. Abo kechi bakebelenga bangauzhi ba Lesa ne. Abo kechi bebakebelanga ne. Kabiji inge umu wakonsha kwiya, ne kwibaletela Kyambo, kabiji ne kweseka kwibabwezha ku Kyambo, bakonsha Kwikikana. Abo kimye kyonse bekyuba, muyewa musango wa bubole.

<sup>70</sup> Inge ntanda ne kipwilo byakwatakana pamo, nishi kechi babena kukebapo nangwa kimo kya bumupashi ne. Abo kechi bakeba ABYO BYOBYAAMBA AYE NKAMBO ne. Abo bakebatu kyobakeba. Bakeba ntanda, ne kwamba mba Benakilishitu; kabiji kwikala mu ntanda, ne kwikala na ba muntanda, kabiji ne kwikala nobe ntanda, kabiji akwe kasa batwajijila lushimuno lwabo amba Mwinakilishitu. Mwayuka, kine kintu ke kino, ke kavulamya ka kumupashi. Abyo kine byokiji. Abo kechi bayuka musango ye bajimo ne. Balubako kyo bafwainwa kuuba.

<sup>71</sup> Inge umu wakonsha kwiya leelo, muyewa musango, bafwainwa kumukana mu musangotu umu. Bajinga na lukatazho lwatama bingi, kabiji byo baji ne leelo. Abo kechi bakonsha kwimweshwa abo bene na bintu bya bulesa, ne jikwabo ne, mambo kechi bebikebelenga ne. Akyo Kyambo, Mamboawama, kechi Beakebelenga ne. Musongo wa bubi wi bamanyikilenga, kabiji batemenwe kyokyo.

<sup>72</sup> Bubi bwawama bingi ku muchima wabula kwaluluka. Bumweka bulongo ku milanguluko yabula kwaluluka, pakuuba ke jishinda ja lufu. Kafwako nangwa kimo kyashalako ne kanatu lufu. “Mfweto ya bundengamambo lo lufu,” kabiji

obewa wafwainwa kutambula mfweto. Anweba mwa byaala ku lubesha, kabiji pano mubena kunowatu kazhimbiji.

<sup>73</sup> Biyukilo bya bumupashi ne kusapwila kwa muluwe watongolwa kufuma kwi Lesa, kechi kwibatwajilepo nangwa kumo ne. Banabakazhi bafwainwa kwibaseka mu kilungi kyabo, ne kwamba mba, “Amiwa kechi nakonsha kumvwa bintu biju byobya ne.” Inge akyo kechi kyabwezhiwapo jibiji ne! Kyokika? Kavulamya ka kumupashi, kine byobyoyo kiji. Abo balubako mba Lesa ne Kyambo Kyanji bajitu pamo, kabiji Aye kechi wakonsha kwi Kipipula ne.

<sup>74</sup> Inge ngauzhi wamwekele mu oa moba kabiji wapana kiyukilo kya bumupashi, jiwi ja bumupashi, ne kupana jiwi ja Lesa panyuma yakyo, bakonsha Kwikisekatu ne Kwikiletela bisela.

<sup>75</sup> Anweba mwayuka ng’ambilo ya kala mba, “Bakosama bakenda na masapoto abyela apa pachiina ba Malaika kunyuta.” Abyo kavulamya ka ku mupashi byo kooba. Kilengela bantu kufika pa kifulo kyakuuba mba kechi bajipo na ng’umvino mukachi kaabo ne. Abo kechi bakebapo kintu kya bumupashi ne.

<sup>76</sup> Tolai mpwijilo ya bumupashi, ako Mupashi Wazhila ko abena kubuka bakolwa kabiji ne kuyuka milanguluko iji mu muchima, kabiji ne kwikibika mu bipwilo byonse, ke kipekeni kikatampe kiji kuno mu kikye kibaza, kabiji talai bikamweka. Mu mamineti achechetu, muntu yense wafwainwa kwimana ne kulupukamo. Kafwako nangwa kimo kya kwingila nakyo ne. Abo kechi bajipo na kimo kya kuuba nakyo ne. Abo bakateleka ku ng’ambilo ya maana akufunda.

<sup>77</sup> Pakuuba inge kyafika ku Bulume bwa Yesu Kilishitu, ne lusanguko Lwanji, ne Mupashi Wazhila, abo kechi bajipo na kimo kyakuuba Nakyo ne, mambo kibazhachisha. Bibambula bu mu mujilo bintu byonka byo bafwainwa kuyuka. Kafwako kufundwa, onkao mambo, kuvwanyika bulongo mu kyokya kimye ne. Bino, akyo, inge wakonsha kwipana kwi akyo, ki—kileta bipangwa bya lulapilo. Nanchi twatana kuuba mba, inge kanko kavulamya ka kumupashi kakwata bantu, nishi abo banji—banji mu musango watama. Pano twatana musango umo. Pano Nasaka ku . . .

<sup>78</sup> Obewa wafwainwa kuyukanyikwa. Kuntu kumo, wafwainwa kumwesha. Bumi bobbe bumwesha, bufuku buno, konka ko wayukanyikwa. Obewa wayukanyikwa mwi Kilishitu nangwa pangye ya Kilishitu. Obewa kechi uji kichika ne. Kechi kujipo kya kuuba mba muntu wapendwa mututulu ne. Kechi kujipo ng’onyi utoka ufita ne. Obewa wi wapuluka nangwa kechi wapuluka ne. Obewa wi wazhijikwa nangwa ndengamambo, umo nangwa mukwabo, kabiji ne byubilo byobe bya bumupashi

ku Kyambo kya Lesa bilengela kuyukanyikwa pepi kine po waimana. Ibyo!

<sup>79</sup> Kyambo kya Lesa, kyashinikinshiwa, kyashinikisha mba lubatizhilo lwa Mupashi Wazhila lujitu pamo nobe byonka byo kyajinga pa Juba ja Pentekositi nangwa kimye kikwabo kiji kyonse. Kabiji Yesu Kilishitu ujitu pamo keesha, leelo, ne myaka yonse. Kabiji byubilo byobe kutazha ku Kyokyo bikuyukisha kana obewa uji mu kavulamyka ka kumupashi, nangwa ine. Abyo ibyo. Nangwatu wikale kana wi kwasho, nangwa wikaletu musapwishi, kechi kilengapo. . .Ee, bekatambula, ne abo. Nanchi twatana kuuba mba, kisambukizhanya ne kukumbana konse. Pano twamona.

<sup>80</sup> Pano, kwikala mwina America. Kwikala mwina America, Nafwainwa kuyukanyikwa na kyaalo kyami. Pano telekai bulongo. Kwikala mwina America, kimye kyo Nasemekelwe mu kino kyaalo, Naikela ngikazhi, kabiji Nayukanyikwa na kino kyaalo. Byonse byokiji, ne Amiwa. Byonse byo kyajinga, ne Amiwa. Mambo Amiwa nayukanyikwa nobe mwina America, nanchi Nafwainwa kusenda buvu bwanji bonse, lukumo lwanji lonse. Musango yense mo kyaikela, Byonji, mambo Nayukanyikwa nakyo. Amena. Nasaka mba anweba mwikiyuke. Amiwa nayukanyikwa mba ne ngikazhi mwina America, nanchi byonse byo kyajinga, Byonji. Byonse byo kiji, Byonji. Amiwa nafwainwa kwikala lubaji lwakyo. Amiwa njina. . .inge Amiwa ne mwina America, Amiwa ne lubaji lwa America. Kabiji byonse byo kiji, Byonji.

<sup>81</sup> Amiwa kechi nakonsha kulubako kikye ne. Inge Nakeba kwikala mwina America wakinekine, Nafwainwa kuvuluka mba Amiwa nji byonka kyaalo kyami byokiji, mambo Nayukanyikwa na kyaalo kyami. Kwikilubako, nangwa—nangwa. . .Kwikilwilako, nangwa kufwila pe aye, nangwa kwimenako byonse byo kyaimenako, Nafwainwa kwimana kulubaji lwanji. Biji kyaalo kyami, Byonji. Byo kyaimenako, Amiwa kyo naimenako. Kwikala mwina America wakine, Amiwa nkekala winengezha kufwilapo, kwikilwila, kwimana nakyo, kuuba kiji kyonse kijiko. Amiwa ne lubaji lwakyo. Obewa kechi wakonsha kwikitola kwakubula nkutola amiwa ne. Inge waamba kintu kimo kyatama pe akyo, wikyamba ku lubaji lwami, mambo Amiwa ne mwina America. Kwi kyamba kwi anweba, nobe mwina America, kabiji ne byo bamba na kino kyaalo, baamba kwi obewa, mambo obewa wi lubaji lwakyo. Kechi mulubeko ne; inge mwauba, nishi muji na kavulamyka, kine pakatampetu.

<sup>82</sup> Kabiji, vulukai, obewa kechi wi mwina America ne inge kechi waikala ku lubaji lumo ne akyo ne. Obewa wafwainwa kwikala, biji America, byo wafwainwa kwikala ne obewa. Amiwa nafwainwa kwikala wakutolako lubaji lwanji. Kino ke kyaalo kyami, Nafwainwa kwikala kulubaji lwakyo. Byokiji,

Byonji. Monai, byo kyajinga, Byonji. Nangwatu kyaikale mu ng'anyi musango, Amiwa kijitu byo kyajinga.

<sup>83</sup> Kwikala mwina America, Nafikile pa Jibwe ja Plymouth, ne akyo, na bashakulu. Nafwayijilwe kuuba; Amiwa ne lubaji lwanji. Najinga pa mbili ne Paul Revere, na kumujimuna bulwanyi bwanji. Inge Amiwa ne mwina America wakinekine, Nafikile pa Jibwe ja Plymouth. Najinga pa mbili ne Paul Revere, na kumujimuna ku bulemo. Bushe mwayuka kyo Mbena kwambapo nyi?

<sup>84</sup> Naabukile pa mabebe amanshika aku Delaware, ne George Washington, na bashilikale banji kwakubula kwabilo. Najinga konka, mambo Nayukanyikwa na kino kyaalo. Aye byo aubile kokwa kyajinga lubaji lwami, byo Nguba pakino kimye ke lubaji lwanji. Nayukanyikilwe ne Washington, pa Delaware.

<sup>85</sup> Naimene ne Stonewall Jackson, lukatazho byo lwajinga lwabaya ne aye, kabiji bamwipwizhe, "Wakonsha kwimana nobe jibwe ja kibumba, inge bintu byakukatazha?" Awa mulongo mucheche wa meso-akifufya alengeshiwa buvu wampachile lukungu na nasapato yanji, aye waambile mba, "Amiwa kechi ntoma meema ne poso Nasachila Lesa Wabulume bonse pa kikye." Nafwainwa kwimana nanji nobe jibwe ja kibumba. Naimene popa na Stonewall ja Jackson. Kwikala mwina America, Nayukanyikwa nanji ne byonse byo aimenapo. Kwabuka bushiya bwa Delaware! Nakulwa nkondo!

<sup>86</sup> Nasutwile mbandela. Amiwa nanjinga nabo byo basupile mbandela pa Guam. Panyuma ya biumbi bya bashilikale bena America kupana bumi bwabo, kabiji aja jibumba jicheche janyemejileko kokwa na kusupa mbandela, Amiwa nayukanyikilwe pa kusutula mbandela; atweba bonse byotwajinga. Bonse bangikazhi bena America bayukanyikilwe na yoya mbandela yakobamine peulu ya Guam. Byo Naumvwine mba babika mbandela peulu popa, mipolo yakukulukile pa mabuta ami. Awa wajinga ami. Awa wajinga obewa. Akyo kyalumbulwile mba atweba bonse, byo twayukanyikilwe na kyokya.

<sup>87</sup> Byonse byo aji, Byonji. Lukumo lwanji lonse ke lukumo lwami. Bonse buvu bwanji ke buvu bwami. Inge waubile bintu byabuvu, nanchi Kamutajisha... waimana pa byamyendeleko byanji. Inge watambula lukumo, Amiwa ntambula lukumo nanji pamo, mambo Nayukanyikwa nanji. Pano, kuyukanyikilwa, Mwinamerica wafwainwa kwimana pa byonse bya buvu bya America, lonse lukumo lwa mu America, byonse byo ajinga. Byonse byo aaji, nangwa byo akekala, obewa wayukanyikwa nakyo.

<sup>88</sup> Pano, kwikala Mwinakilishitu wakine, wafwainwa kwikala musango umotu. Atweba kechi tukeba kulubako kyokyo ne.

Byonse byo Ajinga, Nayukanyikilwe Nanji. Nayukanyikilwe Nanji.

<sup>89</sup> Monai, kabiji Aye uji mwi amiwa, kabiji Amiwa mwi Aye. Monai, nanchi, yense Mwinakilishitu wakine ao wakine Mwinakilishitu—Mwinakilishitu, wajinga Nanji, “Kimye bantaanda ba kumakya byo baimbile pamo kabiji ne baana bakwa Lesa byo babijikile na lusekelo, kasa kuyangye kwikala kintendekesho kya ino ntanda ne.” Atweba twayukanyikilwe na bibese kufwa mwi Lesa, myaka teni milyoni ntanda kasa ikyangye kulengwa ne. Najinga Nanji kunyuma kokwa. Inge Amiwa njina Bumi Bwapeenape, Najinga Nanji kokwa. Nayukanyikilwe Nanji, “Kimye bantaanda ba kumakya byo baimbile pamo kabiji ne baana bakwa Lesa byo babijikile na lusekelo.”

<sup>90</sup> Najinga Nanji kimye kyo Aichile Abulahama pa kimino kya—kya myaka sebetefaiwi, kabiji mukazhaji byo ajinga sikisite-faiwi, kabiji wamubujile mba bakekala na mwaana. Najinga nanji kimye kyo aimene kulubaji lwa ABYO BYOBYAAMBA AYE NKAMBO, “Amiwa nsakwikala na mwaana.” Naimene nanji. Yense Mwinakilishitu mukwabo waimene nanji. Najinga nanji kikye bya meseko aji po afikile. Najinga nanji byo ailenga peulu ya mutumba, na kupana Izaka. Najinga nanji kimye mukoko mulume po amwekele.

<sup>91</sup> Najinga ne Yosefwa byo bamukaine balongo banji, mambo wajinga wa bumupashi kabiji bashala bajinga ba butunshi. Najinga nanji byo ayukile myendeleo ya kupitamo kufuma ku balongo banji mwine. Byo ajinga, Byonji. Abya Byonji, byo ajinga. “Mambo atweba bonse twi umo mwi Kilishitu Yesu.” Najinga ne Yosefwa mu lukelo lwanji, kilende. Najinga nanji byo aile ku kuboko kwa kilujo kwakwa Felo. Obewa wafwaijlwe kuyukanyikwa nanji.

<sup>92</sup> Najinga ne Yakoba abwa bufuku byo esunshile na Malaika bufuku bonse. Amiwa nesunsa, amiwa mwine. Nayuka kyo apichilemo. Nanchi Nesunshile nanji pamo kimye Yakoba kyo ekyubile, mambo Amiwa ne mulongo wanji.

<sup>93</sup> Najinga ne Mosesa byo aile mu Ijipita. Najinga ne Mosesa pa kipupu kyatenenenga. Inge obewa wi Mwinakilishitu, obewa wayukanyikwa pamo na bantu banembwa mu Baibolo. Kechi mwikilubeko ne! Najinga ne Mosesa kimye bantu bonse kyo bamukaine. Najinga ne Mosesa byo aabukile Kalunga Kachila. Byo asutwile kuboko kwanji ne kwenda kuya kulutwe, kabiji ne Kalunga Kachila kashikukile, Nayukanyikilwe mwi Kilishitu pakyokya kimye, kabiji Najinga ne Mosesa pa kyokya kimye.

<sup>94</sup> Byonse byajinga na Benakilishitu, byonse byajinga na baitabila, yense waitabila pakino kimye wayukanyikwa ne yewa muntu. Kyonse byo kyajinga, wafwainwa kuyukanyikwa nakyoy.

Kechi mulubeko kyokyo ne. Umvswa wa uba, uji na kavulamyka ku mupashi; wilubako byo uji.

<sup>95</sup> Pano wayukanyikilwe nanji, ne Mosesa, byo abukile kalunga.

<sup>96</sup> Najinga ne Elaija mu mooba akwa Ahaba, byo basajilenga ng'anyi ye bafwainwa kwingijila, Lesa nangwa Balamu. Twajinga nanji pa Mutumba wa Kamela, byo afukwilenga byakuuba, mambo atweba twayukanyikwa mu Mubiji wa Lesa umo yeka ye ayukanyikilwemo. Nanchi inge twayukisha mu yewa Mubiji, nanchi twafwainwa kuvuluka mba twajinga nanji. Abyo ibyo.

<sup>97</sup> Pano, Najinga ne Davida, kimye kyo bamukaine balongo banji. Najinga ne Davida; byo wajinga, ne obewa, inge wi Mwinakilishitu. Wafwainwa kuyukanyikilwa mu kulengululwa kwanji.

<sup>98</sup> Najinga na baana ba Kihebelu, mu kisha kya mujilo, kimye awa—awa mujilo kechi wakonsheshe kwibasoka ne mambo a Kyeenyi kya Muntu wabu foolo.

<sup>99</sup> Najinga ne Danyela, mu jiyengo ja mabokwe. Nayukanyikilwe moomwa, kimye awa Malaika wa Nkambo kyo ayukanyikilwe mwi aye ponkapa.

<sup>100</sup> Amiwa kine najinga Nanji pa Kalvali. Amiwa nafwainwa kuyukanyikwa Nanji pa Kalvali. Amiwa nafwainwa kufika pa kyokya kifulo, kyakuuba mba, Nayukanyikilwe Nanji pa Kalvali, Nafwile Nanji pa Kalvali. Yense Mwinakilishitu wafwainwa kufwa Nanji pa Kalvali. Inge wabula kufwa Nanji pa Kalvali ne, kechi wakonsha kwikala umo Wanji ne. Najinga konka kimye Aye kyo afwile. Amiwa wafwile Nanji. Kabiji pano Najinga Nanji kimye kyo Asangwilwe kufuma mu bafu. Namwekele Nanji pa lukeelo lwa Lusanguko, monka mu lusanguko. Kyonse kyo Aubile, Najinga konka ne Aye; yense waitabila wajingatu pamo.

<sup>101</sup> Kabiji pano Amiwa nabikwa Nanji mu bifulo bya Mwiulu mwi Kilishitu Yesu, na bulume bonse bwa kalunga kabafu kasa kashindwa, monka mwi Aye. Yense waitabila Mwinakilishitu waikela mu musango umo, mambo wafwainwa kuyukanyikwa.

<sup>102</sup> Pano Netana amiwa mwine, mu ano moba apelako, na bavula Benakilishitu baitabila, bayukanyikwa mu mwingilo Wanji. "Aye ujitu pamo keesha, leelo, ne myaka yonse." Amiwa netana amiwa mwine, mu jino juba, wayukanyikwa mu mwingilo Wanji. Bushe obewa witana obewa mwine mu yeo musango, ne kwikiketekela, ne kwenda nakyo? Monai, mingilo yo Aubilepo, Aye waambile mba waitabila ukooba kintu kimo. "Mingilo yonguba Amiwa ne anweba mukeyuba." Nanchi wakonsha kuyukanyikwa Nanji nyi? Pano inge myendeleo yaiya pa Kyambo, wakonsha kushinda myendeleo nobe byonka byo Aubilepo, monai, kuyukanyikwa Nanji? Nayukanyikilwe Nanji.



103 Najinga Nanji pa Juba ja Pentekositi. Najinga na banababwanga kookwa, nayukanyikilwe nabo mu lubatizhilo lwa Mupashi Wazhila.

104 Nakumya kana kipwilo kechi kiji na kavulamyamba kabaya kyakuuba mba abo kechi bayuka ne, bamo mwiabo, kechi baketekela amba kuji kintu kyayewa musango nobe Mupashi Wazhila ne. Mwamona kipwilo po kyafika? Ke musongo wabaya bingi wa kavulamyamba! Monai, balubako mba ye Yesu Kilishitu wabwelele kokwa. Balubako Yesu Kilishitu byo ajinga. Abo balubako. Abo balangulukile mba Aye wajingatu u—ulengamizhilo, nangwa Ngauzhi, nangwa ke—ke muntu wawama. Abo balubilemo mba Aye wajinga Lesa. Abo balubilemo mba Aye ujitu pamo keesha, leelo, ne myaka yonse. Kabiji kipwilo kiji na kvulamyamba ka kumupashi katama bingi. Abo balubako byonse bye bintu. Abo kechi Bekikwatakanya ne.

105 Twafwainwa kwikala na banababwanga pa Pentekositi, kasa twayukanyikwa nabo. Nayukanyikilwe na busapwishi bwa Petelo pa Juba ja Pentekositi, mu Byubilo kyapitala kyabu 2. Naumwine byo aambile. Naketekela byo aambile. Amiwa nakokejile byo aambile. Pano Nayukanyikwa mu musango umo.

106 Kechi mwikale na kavulamyamba ka kumupashi ne. Mambo, obewa wakonsha, obewa ukemwesa obewa mwine na kintu kikwabo. Ikala bulongo na kyokya Kyambo!

107 Twajinga pamo na Kipwilo kimye po kyampewe mwingilo kwi Yesu Kilishitu, mu Byubilo, kyapitala kyabu 16. “Yainga panopantanda ponse, na kusapwila Mamboawama ku kilengwa kyonse.” Nasaka kuyukanyikwa momwa, “Ntanda yonse, ku kilengwa kyonse.” “Abye biyukilo bikebalondelanga baitabila,” bakonsha kuyukanyikwa mu kyokyo.

108 Kyawama, pano, obewa wayukanyikwa na kyokyo, nangwa uji na kavulamyamba ka kumupashi, inge watanwa mba kechi waketekela mu byobyoby biyukilo kulondela baitabila ne? Monai, inge kechi mwikiketeele ne, nishi muji na kavulamyamba ka kumupashi, monai, obewa walubako akyo Lesa kyo alaile. Aye waambile mba, “Abye biyukilo bikebalondelanga baitabila.” Kechi mulubeko ne. Anweba kechi mwakonsha kwikilubako kabiji ne kwikala Mwinakilishitu ne. Obewa wafwainwa kuyukanyikwa nakyoy.

109 Mwafwainwa kuyukanyikwa na Yoano Wazhila kyapitala kyabu 14, veeleshi wabu 12. “Aye wangitabila Amiwa, mingilo Yonguba ne aye ukeyuba.” Kechi mwikilubeko ne. Inge mwikyuba, nishi anweba muji na kavulamyamba ka kumupashi. Obewa wilubamo byo uji. Obewa walubako lushimuno lobe byo luji.

110 Pano ibyepi, Aye waambile mba, “Umwwe mwaikala mwi Amiwa, kabiji ne Kyambo Kyami mwi anweba, mwakonsha kwipuzha kyonse kyo musaka kabiji kikemubilwa”? Bushe

obewa wayukanyikwa kokwa, kyakuketekela mba akya Kyabukine? Mako 11, byo Aambile mba, “Inge waamba kuyuwe mutumba, ‘enda,’ kabiji ne kuzhinauka mu muchima obe ne, bino waketekela mba kyo waamba kisa kufikizhiwa, wakonsha kwikala nakyo kyo waamba.” Bueshe wakonsha kuyukanyikwa popa, ku ketekela mba abwa bo Bukine? Inge kyabula kubiwa, nishi obewa ubena kutambula kavulamy ka kumupashi.

<sup>111</sup> Kabiji—kabiji walubamo, wataya kwimana koobe kwa Bwinakilishitu. Obewa kechi wakonsha kubulang’ana ng’anyi lubaji lo ujiko ne. Mwaamba mba, “Amiwa ne Methodist. Amiwa ne Baptist. Abo byo Nayukapo pa kiky. Amiwa ne Pentekosito. Amiwa ne *kikye, kyokya*, nangwa *kikwabo*.” Keketai! Akyo kyalumbulula mba kiyukilo kya kikola kibena kumweka pe obewa, amba uji na kavulamy ka ku mupashi.

<sup>112</sup> Mwaamba mba, “Kyawama, Mulongo Branham, Na—Naketekela *kikye*, kabiji Ami—Ami kechi nguba. . .” Pano pembelaiko mineti umo. Inge Lesa walaile kuuba bibye bintu, kabiji waambile mba bikekalako mu moba akapelako, kabiji ne mafunjisho obe a bantu akakulengela kubula kutanwamo, akyo ke kiyukilo kyawama kyo Nakonsha kumona kiyukilo kya kikola pe obewa. Ke kavulamy ka kumupashi. Obewa walubako kwiyukisha obewa mwine na Kyambo.

<sup>113</sup> Mwaamba mba, “Amiwa kechi naketekela mba bakolwa babukwa ne.” Obewa uji na kavulamy ka kumupashi.

<sup>114</sup> Mwaamba mba, “Amiwa kechi naketekela mu lubatizhilo lwa Mupashi Wazhila ne.” Kavulamy ka kumupashi!

<sup>115</sup> Mwaamba mba, “Amiwa—Amiwa kechi naketekela mba Lesa walaile kuuba bibye bintu mu moba akumpelo ne.” Nanchi obewa watelekele ku lufunjisho lwa bantu, nangwa lufunjisho lumo, mu kifulo kya Baibolo. Obewa uji na kavulamy ka kumupashi. Obewa kechi wayuka lubaji lo ujiko ne. Ubena kwisolola kwikala, “Mwinakilishitu,” kabiji kasa ubena kukana Kyambo. Kikubwezha jibiji ku kavulamy ka kumupashi, monai, kechi wayuka po waimana ne. Obewa uji na kavulamy ka kumupashi. Obewa kechi wakonsha kuyukanyikwa obewa mwine na Binembelo ne.

<sup>116</sup> Obewa wafwainwa kwikala na banababwanga. Obewa wafwainwa kwikala na Binembelo byonse, na Kipwilo byo kyabikilweko. Pano, bino, Kipwilo byo kyapeewe mwingilo, “Yainga panopantanda ponse na kusapwila Mamboawama; abye biyukilo bikebalondelanga baitabila,” awa wajinga mwingilo wanji. Pano banji. . . Awa wajinga mwingilo.

<sup>117</sup> Pakuuba abo baji na musango watama bingi wakako kavulamy ka kumupashi, kijitu pamo nobe Eva byo ajinga pa. . . pe aye, kuzhokoloka mu bujimi, juba jimo. Pano aye uji pamo nobe Isalela, ubena kumanama ku kiky kikola kimo, kubula kilaka kya kajo ka ku sukuulu ka kemupa

kavulamyka ka kumupashi. Watambula kajo ka ku sukuulu, ukekala wabula kilaka kya kajo, kabiji pano, kintu kitanshi mwayukatu, ukatambula kavulamyka katama bingi. Obewa kechi waketekela kyonse kyaamba Baibolo ne.

<sup>118</sup> Alo lolukatazho luji na kipwilo leelo. Alo lolwine lukatazho kechi twakonsha kwikala na kusangululwa leelo ne. Alo lolukatazho luji na bantu buleelo. Abo batwalwa bingi mu mujilo wa bintu byonse, kabiji ne kintu kyonse kya mwekanyika, poso babula kuyuka kyawama ne kyatama. Kyakine. Aye kechi wakonsha kuvuluka Nkambo yanji ne. Aye kechi wakonsha kuvuluka Kyambo Kyanji ne. Aye kechi wakonsha kuvuluka mulaye ne.

<sup>119</sup> Alo lo lwajinga lukatazho na Isalela, Yesu byo aishile pa kyokya kimye. Abo kechi bakonsheshe kuvuluka, amba, “Kisungu ukemita ne.” Abo kechi bakonsheshe kuvuluka Mosesa amba Mosesa waambile mba, “Aye Yehoba Lesa wenu ukemwimenya Ngauzhi uji pamo ne Amiwa.” Bajinga na kavulamyka ka kumupashi.

<sup>120</sup> Abyo kine kipwilo byo kiji leelo. Aye waambile mba, “Kikeya kufikizhiwa mu moba akapelako,” amba abye bintu bikobiwa, abyo byotubena kumona na kubiwa, kabiji kipwilo kyaikala nobe kyafwa twelufu koloko. Kyo kika? Kavulamyka ka kumupashi. Twitela atweba bene mba Pentekositi, kabiji kechi twakonsha kumwesa ne, kabiji kechi twakonsha kwimwesa atweba bene mu Kyambo inge Kyasapwilwa mu bulume bwa lusanguko lwa Kilishitu ne; kabiji Aye uji muno mukachi ketu, na kwikyuba, kabiji kasa abena kuuba byonka Aye byo aambile mba Ukeyyuba. Pano, keketai, ntachikilo yetu ya dinominesheni itutwala mu kvulamyka ka kumupashi. Atweba tubena kumanama. Kechi twayuka ku lubaji lo tujiko ne. Muntu umo usenda mapepala kufuma ku *kikye* kipwilo ne kuya ku *kikwabo* kipwilo, kabiji *kikye* kipwilo, kabiji ne *yuwe* mutanchi ne *yewa* mutanchi. Mwamona?

<sup>121</sup> Kyotubena kukeba, ne jikwabo, ke Amosi mukwabo kufika pa kifulo, na ABYO BYOBYAAMBA AYE NKAMBO. Bushe twakonsha kumutambula nyi? Nobe byonka byo baubile. Abo kechi bamutambwile ne. Abo kechi bakonsha kumutambula leelo ne. Aye kechi wakonsheshe kutuula mutwe wanji pa kifulo ne, kyakosele, kusapwila. Pano, abyo kine ibyo, mambo kipwilo kibena kumanama na kavulamyka ka kumupashi.

<sup>122</sup> Pano, kika? Lesa walaile mu ano moba apelako, “Kimye Mwaana muntu po akasololwa,” monka mwaila Luka, kyapitala kyabu 17, “na kiyukilo kyamwekele mu Sodoma, kikobiwa jibiji.” Kabiji bantu bamo bekimona kyaubiwa, kabiji bamo kechi bekiketekela nangwa pacheche ne. Balanguluka mba kutanga milanguluko ya bantu. Balanguluka mba ke mupashi wakwa diabola. Kyokika? Babena kumanama na kavulamyka ka

kumupashi. Abo kine ibyo. Abo kechi bakonsha kukwatakanya Nkambo ne. “Yesu Kilishitu ujitu pamo keesha, leelo, ne myaka yonse.” Aye Byo ajinga kyokya kimye, Byo aji kino kimye.

<sup>123</sup> Bino, kika kyamweka, kechi twakonsha kwimwasha atweba bene na Kyambo ne. Kika? Aye, kechi wayuka ne kana uji mu nzubo ya bwenyi nangwa kana kipwilo. Aye kechi wafwainwa kutelwa mba nzubo ya bwenyi ne, kabiji kechi wakonsha kutelwa mba kipwilo ne; mambo, kutelwa mba kipwilo, wafwainwa kwiyukisha aye mwine ne Kilishitu. Akyo kimupa kavulamy ka kumupashi. Kabiji kechi wakeba kutelwa mba nzubo ya bwenyi ne. Nanchi kechi kipwilo kya Pentekosito, kipwilo kya Methodist, kipwilo kya Baptist ne; ke nzubo ya bwenyi ya Pentekosito, nzubo ya bwenyi ya Methodist, ne nzubo ya bwenyi ya Baptist, mambo kechi wakonsha kwiyukisha na Kyambo ne. Kabiji umvwe Kyambo kya mwekanyika, kechi bakonsha Kwikiketekela ne. Ke kikola, kavulamy ka kumupashi. Kechi bakonsha kwi mwesha abo bene ne; abo kechi bayuka kobaji ne. Abo ibyo.

<sup>124</sup> Kijitu pamo nobe kumvwangakanya lusemo. Nobe byonka byo Ng’amba kimye kyonse, “Amiwa kimye kyonse ndanguluka mba kintu kimo kyatama kyo Namonapo ke myule.” Monai, aye wasemekwa mu kumvwangakana. Monai, inanzi wajinga mbili mukazhi, bashanji bajinga mbongolo mulume, kabiji aye kechi wayuka ne lubaji lo ajiko ne. Kabiji kintu kitansi mwayukatu, anweba—anweba—anweba mwakonsha ku musemesha mwafuma mbongolo, kabiji pano . . . nangwa kutola mbongolo, bino mbongolo kechi wakonsha kwisemesha aye mwine jibiji ne. Monai, aye kechi wakonsha ne. Anweba kechi mwakonsha kumufunjishapo kintu nangwa kimo ne. Aye uji na muchima-wakonsa. Anweba kechin mwakonsha kubulang’ana kiji kyonse . . . Mwakonsha kwi abika matwi akatampe. Kabiji ukapembelela poso juba jalempesha ja bumi bwanji, pepitu na kufwa, pakuuba mba akupate. Byo byonka. Aye ubena kupembelelatu kintu kimo kyakukuvumbukila, inge wakonsha kwikyuba.

<sup>125</sup> Kabiji akyo kimbika mu milanguluko ya bavula batelwa-mba Benakilishitu bamvwangakana. Abo bekimvwangakanya kipwilo poso baikala na kikola kya kavulamy ka kumupashi. Abo kechi bakonsha kwisemununa jibiji ne.

<sup>126</sup> Bambatu pa mataba akumvwangakanya. Mataba akumvwangakanya kafwapo kyo aji ne. Ke kintu kyakila bingi kutama inge wikibika mukanwa nkobe, kiji kyonse kyakumvwangakanya. Ao oene mambo kyo mwafwainwa kubula kutola bijimwa byafuma pa mifundo yavula, kabiji ne bintu byakumvwangakanya, binsasai ne kwibikomesha kabiji ne kwibilamawizha. Kika? Mambo kechi bakonsha kufumyapo bilongolo ne.

127 Pakuuba byakine, biine bitutulu, kechi mwafwainwa kwibisasa muchi ne. Aye uji na Bulume mukachi kanji, bwa kufumyamo bilongolo mukachi kanji. Abyo byo kyubiwa pa kufumyapo bilongolo bya kubula luketekelo pa wakine muntu wayulwa-na Mupashi.

128 Tolai myule wakala, kabiji uyenga na kwamba nanji, amba, “Ambai mba, mulunda, Nasaka kuuba *kikye, kyokya.*”

129 Aye waikala popa, “Aaa! Aaa! Aaa!” Aa matwi akatampe kwingila peulu-ne-panshi. Amiwa namona ba—bavula Benakilishitu baji byobya, batelwa-byobyo.

130 Mwaamba mba, “Yesu Kilishitu ujitu pamo keesha, ne myaka yonse. Abye biyukilo bikebalondelanga baitabila.”

131 “Aaa? Naketekela mba mooba abya kukumya apita. Aaa? Aaa? Aaa?” Monai, aye kechi wayuka byo aketekelamo ne. Aye kechi wayukapo kintu nangwa kimo ne. Aye kechi wayuka koafumine ne; aye kechi wayuka ko abena kuya ne. Aye uji na kavulamyaka mabili. Aye kechi wayuka koafumine ne, kabiji kechi wakonsha kuya kulutwe ne.

132 Bino Amiwa natemwa mwine musango. Oo, aye wanekena. Wakonsha kwamba kwi aye. Aye wayuka bashanji bo bang’anyi, bainanji bo bang’anyi, bang’anyi bankambo yanji babalume ne babakazhi. Aye uji na bipepala bya kumumweshwa kwepi nkoafumina.

133 Kabiji Amiwa natemwa Mwinakilishitu wayuka bashakulu banji, wakonsha kubwela kunyuma ku Kyambo kya Lesa, kufika ne ku juba ja Pentekositi, kabiji ne kwiyukisha abo bene na bazhijikwa, ako Bulume bwa Mupashi Wazhila po bwaishile pe abo. Awa Mwinakilishitu wayuka bashakulu banji. Aye wayuka kwepi nkoafumine. Aye kechi wimweshwa na ba Methodist, Baptist, nangwa kintu kikwabo ne. Aye wimweshwa mu Kyambo kya Lesa. Aye wayuka bulongo poaimana. Aa Mashi a mubufumu bwa Bashanji kasa abena kupita mwi aye; Mashi akwa Yesu Kilishitu. Aye wayuka byo Oba! Aye waketekela Kyambo kyonse. Lesa wingijila mwi aye kabiji ne kwikishinikisha na biyukilo byo Alaiile mba bikalondela. Aye kechi uji na kavulamyaka ku mupashi ne. Aye ye mwine wakiine. Natemwa kyokyo.

134 Pakuuba kipwilo leelo kiji na kikola kyatama bingi kya kavulamyaka kumupashi. Kechi wayuka lubaji lo ajiko ne. Aye walubako pa Byonse bye, walubako bintu byonse bye bikilengela kwikala Kipwilo.

135 Kika kitulengela atweba kwikala banoshi bingi? Kyafika mu kifulo kya Laodikeya jibiji, kubwela mu kyokya kifulo kyabunoshi nobe Isalela byo ajinga. Kimye kyo ajinga kamulanda waketekejile Lesa pa bintu byonse byo akonsha kuuba, bintu byonse byo ajinga nabyo, waketekejile Lesa; nanchi Lesa wajinga nakyo, kabiji kyajinga kya bumupashi, kabiji

kyatwajijiletu kuya kulutwe. Pakuuba byo aikele munoshi, abye byo byamwekele: mizhi yashimikilwe, kabiji banabakazhi baabo baikele na byubilo byatama, banabalume baabo bebiswishishe, basapwishi baabo banekeneshe mikambizho, ne kujimbulula bangauzhi. Kabiji awa ye musango ye batwelelemo. Kika kyalengejile byobya, kyajinga mambo akulubako kwafuminenga mapesho.

<sup>136</sup> Kabiji anweba ba Methodist, kabiji anweba ba Baptist, ne anweba ba Presbyterian! Anweba ba Methodist mwakonsha kuvuluka John Wesley. Anweba ba Baptist! Kabiji John Smith wajijile na byubilo bya bantu poso mukazhanji wamutangijile kuya ku tebulu, meso anji avimbile kumvwetapo, mambo a kujila ne kulomba bufuku bonse. Lukatazho lweepi?

<sup>137</sup> John Wesley waambile mba kintu kimo kikatampe... Naketekela kyajinga umo wa bashakulu batanshi ba Methodist baambile mba, “Byabuvu bya baana babakazhi ba kipwilo kya Methodist, kwatatwile kuyatu mu ntanda kyabaya, bamvwajilenga malingi ku minwe yabo.” Pano wakonsha kwamba ka, na tuputula ntobamvwala?

<sup>138</sup> Kika kyamwekele? Kavulamy ka kumupashi. Kine byokiji, kulubako. Anweba muji na byonse bye bintu mambo Lesa wibipana, buwame boobwimubijilekyo.

<sup>139</sup> Bushe mwalanguluka mba akye ke kintu kyenye nyi? Kine kiji na Mupashi wakwa Yesu Kilishitu, kwaula. Mu Lumwekesho, kyapitala kyabu 3, kyaambiwa mba, “Mambo obewa waamba mba, ‘Amiwa ne munoshi, Amiwa kechi nakajilwa kintu nangwa kimo ne,’ kabiji kechi wayuka mba obewa wi kamulanda, mpofu, muyaji, wamanyikwa, uji bwamba, kabiji ne kwikiyukatu ne” Mwamona, kechi wikiyukatu ne! Kyo kika? Kavulamy ka kumupashi. Abo kechi bekiyuka ne.

<sup>140</sup> Bipwilo biji na—na mali pano. Kechi kujipo kipwilo, nangwa kimotu ne, mu kyaalo, kya dinominesheni, kana kyamutengo ma milyoni na mamilyoni ama dola. Kushimika mamilyoni na mamilyoni ama dola mu bishimikwa ne bintutu bikwabo, kabiji ne kusapwila mba Kwiya kwa Nkambo kujitu pepi. “‘Munoshi,’ kabiji waambile mba, ‘Amiwa kechi nakajilwa kintu nangwa kimo ne.’” Basapwishi bawama bafunda bingi bo bajinga nabo, bayuka bya masukuulu a mamboawama kukila ne byo bayuka. Kabiji baji na bishimikwa byabaya bingi, bufulo byasalululwa mukachi ka muzhi. Abo baji na nsambu ya kintu kiji kyonse kyo bakeba kuuba. Kabiji pano baubile byepi? Baji na kavulamy ka kumupashi kabiji balubako amba Lesa ye wibobijile kyokya, pamo nobe Isalela.

<sup>141</sup> Kabiji Baibolo waawile mba, Yesu Kilishitu watumine malaika Wanji kwi Yoano ne kwamba mba, akye kipwilo kyapelako kikekala na kavulamy ka kumupashi. Bajinga “kewamanama,” vulukai. Balanguluka mba babaya bingi.

Balanguluka mba baji na kintu kimo. Bino Aye waambile mba bajinga “bayanji, bamanyikwa, bakamulanda, bampofu, baji bwamba, kabiji ne kwikiyukatu ne.” Kabiji kechi kujipo jishinda ja kwibabujilamo ne.

<sup>142</sup> Pano, inge mwanamulume wajinga papo pa mukwakwa, walengeshiwatu buvu, nangwa mwanamukazhi, uji bwamba, pa mukwakwa, mpofu, akyo ke kintu kyabulanda kyakutanwamo. Bino umvwe bajinga na manna aji bulongo, bayuka musango ye bajimo, amba bajinga muntu, kabiji bafwainwa kumvwala bya kuvwala; kyawama, waya kokwa; abo—abo ke bantu, bafwainwa kuyukanyikwa na mutundu wa muntu; kabiji kokwa, “bayanji, balusa, mpofu, uji bwamba.” Kabiji waya kwi aye, na kwamba mba, “Mulongo, obewa uji bwamba.”

<sup>143</sup> “Pano, papo! Amiwa ne Dokotala *Kananga-ne-kananga!* Obewa ntaatu muchima ku mwingilo obe. Amiwa na kubuula, Amiwa ne wa ku *Kananga-ne-kananga!* Obewa kechi ujipo na mwingilo ne, obewa upanga kyongo kyazhila, kafwako kyo wakonsha kumbula ne!” [Kafwapo bijipo pa tepu ne—Waku.]

<sup>144</sup> Babulai, “Ke kintu kyatama mwanamulume kuuba kikye, kabiji ne bantu kuuba bintu byo babena kuuba.”

<sup>145</sup> Kabiji bakonsha kukubuula mba musapwishi wabo wayuka-byavula. Mwamona? Kyokika? Kiji, balubako mikambizho yanji Nkambo Yesu. Pano lekai Aye eye na kuuba biyukilo ne byakukumya byo Aambile mba Aye ukebyuba, abo kechi bakeba kwikiketekela ne. Ke kavulamyka ka kumupashi. Monai, abo balubako! Kabiji baji bwamba, kabiji kechi bekiyuka ne, kechi bekiyuluka ne.

<sup>146</sup> Abo balanguluka mba, “Mambotu akuuba mba Amiwa ne walamata ku kipwilo, kyo kyonka kikebewa.” Oo, mulongo, akyo kechi kyalumbulula kintu kwi Lesa kukila kwikala Masoni nangwa kintu kikwabo ne, nangwa kikwabo mwakwikala ne. Kwikala ku lubaji lwa kipwilo, akyo kechi kyalumbululapo nangwa kintu kimo kwi Lesa ne.

<sup>147</sup> Mwafwainwa kwikala baana babalume ne babakazhi bakwa Lesa. Mwafwainwa kusemwa kwi Lesa, kabiji Lesa ye Kyambo. Inge Naikala ku lubaji lwa ba taata, Ngikala byonka biji bataata. Umvwe waikala ke lubaji lwa kwa Lesa, obewa wikala Lesa, wapwijijika. Kyambo Kyanji kyonse, obewa wikiketekela Kyonse.

Kavulamyka ka kumupashi!

<sup>148</sup> Pano ibyepi inge kechi wayuka jizhina jobe byonka byojiji ne? Kabiji inge byo uji, obewa ukafuma ku kisemi kyawama, akyo Naketekela mba obewa byo waubile, inge wafuma ku kisemi kyawama kya bantu, pano ibyepi inge walubako jizhina ja kisemi, kabiji walupuka muno, ke wikale bwikalo bwatama? Baamba mba, “Bushe jizhina jobe kechi Jones ne,” nangwa musango yense mo kyaikela. “Kyawama, Amiwa kechi nayuka

byo Najinga ne.” Mwamona? Kijitu bulongo, monai, akyo ke kintu kyatama bingi, ke musango watama bingi kwikalamo.

<sup>149</sup> Kyawama, apo ipo kipwilo po kyafika. Kyafwainwa kwikala kya kwimenako Yesu Kilishitu. Pakuuba kyalubako byobyoy, mambo kiji na, kyabikwamo, mafunjisho a kipwilo ne madinominesheni, kyakuuba mba baswako kyokyo mukifulo kya Kyambo. “Kabiji banji bwamba, bampofu, bayaji, ne kwikiyukatu ne,” kabiji kechi kujipo mwakwibabuujila ne.

<sup>150</sup> Amiwa kape kechi katanwamo mu Birmingham jibiji ne, bino akye kyo kimye kitanshi po bakekyumvwa. Mwamona? Mwamona? Ibyo. Amiwa jitu. . . Amiwa kechi njipo na nsambu pa kintu kikwabo ne kanatu kubyala Lukunwa. Lesa wi Kitwala mu mushiji mo Kyafwainwa kuya.

<sup>151</sup> Balubako, ee, balubako Kyambo kya mulaye. Abo balubako. Isalela wajinga muyekawa musango kimye Yesu kyo aishile. Abo balubilemo. Abo bamwene, oo, baambile mba baketekela mba Mesiyasa ubena kwiya. Pakuuba kimye Mesiyasa kyo aishile ne kwiyukisha wimwesheshe Ayemwine kupichila mu Kyambo, bajinga na bisho byavula kyakuuba mba balengejile Kyambo kya Lesa kyaikala kyabula bulume.

<sup>152</sup> Kabiji Yesu walaile, kimye kya kumpelo, “Byonka byo kyajinga mu Sodoma, nanchi byobyoy kikekala.” Kabiji kyakonsha kuyukanyikwa, kabiji bantu baji bingi kisho poso balengela mulaye wakwa Lesa wabula bulume, kupichila mu kisho kyabo. Kavulamya ka kumupashi! Kavulamya ka kumupashi byo kaji. Monai, balubako bibye bintu.

<sup>153</sup> “Oo, Amiwa nalamata ku *kikye*. Amiwa—Amiwa naubile *kikye*. Nazhile mu Mupashi. Naubile *kikye*.” Kyawama, ami, ami, akyo kechi kijipo nakintu kimo nakyo ne, nangwa pachechetu ne.

<sup>154</sup> Wakonsha kwikala byepi Mwinakilishitu kabiji wakana Kyambo? Kuuba mwikyuba ne. Lesa ye Kyambo. Inge Kyambo kiji mwi obewa, obewa ne Kyambo mujitu pamo. Kyonse Kyambo byo kiji, byo uji. Amena. Inge Mbena kwikala mu kino kisemi, ng’anyi kibese kya Kyambo kyalailwa mu kino kisemi, Nafwainwa kwikala byobyoy. Inge Amiwa nsakwikala Mwinakilishitu, Nafwainwa kuyukanyikwa na byonse Baibolo byo asapwilapo kabiji ne kyo baimenapo.

<sup>155</sup> Aleluya! Musakutela mba uba kyongo kyazhila, nangwa byonkabyo, kabiji Naumvwa kwikala wabupopweshi poka pano. Ee, mwane.

<sup>156</sup> Nafwainwa kuyukanyikwa na bintu byonse byaamba Baibolo. Kabiji Kipana byonse byo kyambapo, kabiji, inge kechi nafikilwa na kavulamya ka kumupashi ka mooba-etu aleelo ne, Amiwa kekala ne kuyukanyikwa Nakyo. Inge Amiwa Nekikana, nishi Njina kavulamya ka kumupashi; kintu kimo kyamweka, Amiwa na itabila mafunjisho a bantu nangwa lufunjisho, nangwa kipwilo kimo nangwa jibumba ja bantu.



“Amiwa kechi nakonsha kwikyuba ne,” bino Kyambo byo kiiya kabiji ne kwimweshwa Akyokine.

<sup>157</sup> Oene mambo Yesu kyo abujiile kuyukanyikwa. “Oo,” baamba mba, “kyawama, awe muntu wazhila, kabiji pulisiti wetu wazhila, awe *wetu* wazhila.”

<sup>158</sup> Kabiji Yesu waambile mba, “Anweba mwiba kwa shenu, diabola, kabiji ne mingilo yanji mukeyuba.”

<sup>159</sup> Bushe mwayuka mba Kaina walambwile naji kitapisho kyawama, ne apo? Aye wajinga wabukishika, washimikile kitapisho, wafukamine panshi kabiji wapopwejile, kabiji wapaine kitapisho, ne kulomba kwi Lesa. Kabiji inge, Lesa, akyo kyo kyonka Lesa kyo akeba, kwikala kulubaji lwa kipwilo kabiji ne kwikala na kitapisho, kabiji ne kupana bya bujikumi ne kuya ku kipwilo, ne kwikala bumi bwawama; inge byo byonka Aye byo akeba, Aye wajinga wabula koloka mu kuzhachisha Kaina, mambo aye waubile kintutu kimo. Ee, mwane. Abyo kine ibyo.

<sup>160</sup> Bino *bupopweshi* kyalumbulula mba “kya kwivweta,” kabiji kuuba wimvwetwa na mingilo yenu yawama ne. Kujitu kintu kimo akyo Lesa kyo akonsha kuswisha, kabiji ke Mashi akwa Yesu Kilishitu. Akyo kyo kyonka kya kwimvweta. Pangye ya Kyokyo, inge waamba mba, “Lamai mikambizho ya bantu,” kavulamyaka kumupashi! Akyo byo kyamwekele.

<sup>161</sup> Pano monai, balubako Kyambo kyabo. Balubako Baibolo. Balubako mulaye. Babena kweseka kwikala mu kifutele kya ba Methodist, Byajinga ba Baptist, byajinga muntu mukwabo. Awe ye mulaye wa mujojo juba, kabiji Lesa ubena Kwamba kupichila mu Kyambo Kyanji, kabiji ne kushinikisha jibiji amba Kiji byonkabyo, kabiji baikala babula Kwikitabila. Kavulamyaka kumupashi! Abyo kine ibyo. Kapwijijika, kapwijijika kavulamyaka, kine Kwikitabila nangwa nangwa pacheche ne.

<sup>162</sup> Mushilikale wa ki French. Nabujilwe jishimikila jicheche; kasa tukyangye kushika ne. Amiwa kechi najikuyuka mba kimye kyapwa ne, kabiji Njina bipepala jikumi byanembwa papo; kebyuba kimye kikwabo. Monai, mushilikale wa ki French. Baji na jibumba ja bashilikale kufuma mu mazhita, kabiji bajinga na kako kavulamyaka. Bajinga bavulang’ana, ku nkondo. Kabiji bajinga na mutanchi, kabiji abo—abo baichile bantu bajinga na batemwe baabo babula kumweka kwibeeta mba bayuke baabo bansongwalume. Kechi kwajingapo luketekelo lwabo ne, kapepo umo nangwa babiji, kufuma mubooba, bayukanyikilwe. Kabiji basendele bashajilepo, bayilenga na kwibabika mwakusungila bavulang’ana, amo mo bafwajilwe kwikala moba abo a bumi.

<sup>163</sup> Bakajijilenga katumbatumba, sitima yandoselenga; kabiji baimene pa kitesheni, bansongwalume balupukile na kololako maulu abo. Kabiji bamalonda bakajijile peulu ya

katumbatumba, na kwibasopa, mambo bajinga na kavulamy, kika, abo—abo bebasopelenga.

<sup>164</sup> Nanchi bamwene mulunda umo popa, walupukile kabiji watatwile kukeketa na kumona ntaki wa meema, wakenketele kuzhokoloka katumbatumba. Aye wanshiimwine mu kilungi kyanji, ne kumona wamwene. Kabiji watajile ne jikwabo, kabiji wamwene yewa ntaki wa meema. Aye wakeketele konsekose pa kiteshenyi, kabiji watatwile kwenda. Mukifulo kyakuuba mba usopa amwimike, wamulondejilengatu.

<sup>165</sup> Wayile peulu ya katumbatumba, ne kunkulukako pacheche mu kajishinda, waalulukijile ku kilujo ne kukajila pa kakwabo katumbatumba kakacheche, kabiji wafikile ku kanzubo kalepuluka. Aye wantajile. Amwa mu kanzubo mwalupukile, mwanamulume mukote wajinga na kikote mu kuboko kwanji, wafikiletu wa mukumbata. Waambile mba, “Mwanami, Nayukile mba ukabwela. Bambujile mba wafwa, bino Nayukile mba ukabwela.” Kabiji awa nsongwalume wabwelele mu bumuntu bwanji. Kavulamy kafumine pe aye. Aye wakonsheshe kumuyuka. Aye wayukile mba aba bajinga bashanji.

<sup>166</sup> Oo, mushilikale wa Musalabo, awo wavulang’ene mambo akuvula lufunjisho, byavula byakuvulang’ana kwa ma dinominesheni ne mafunjisho a bantu, kabiji ne bintu bya muntanda, kika kyo wabujila kukifumako pa mamineti acheche ne kubwela kupituluka ku Baibolo? Mwafwainwa kupitang’ana, kabiji wakonsha kwitana obewa mwine wayukanyikwa mu Kyambo, nobe waitabila, juba jimo. Anweba kechi mwakonsha kumuyuka Aye ne. Anweba mwakonsha kubwela ku bumuntu bwenu, nobe byaubile mwaana walubile, kabiji ne kwitana obewa mwine. Wakonsha kutana kuyukanyikwa koobe mu Byambo bya Lesa.

<sup>167</sup> Muntu umo waambile, juba jikwabo, kechi papita kimye kyabaya ne, waambile mba, “Bino, Mulongo Branham, tala kwi atweba bantu baki Pentekosito, bipwilo byawama byo tuji nabyo. Kika, atweba, tuji na bamingilo abo bafunjishiwa.”

<sup>168</sup> Telekai, inge mwanamulume wasongola wa mukazhi, aye kechi uketekela mu buuya bwanji ne. Ine. Aye uketekela mu lukokelo lwa luchipo lwanji, kyambo kyanji. Aye kechi uketekela mu buuya bwanji ne. Aye uketekela mu lukokelo lwanji.

<sup>169</sup> Kabiji abyo byo kikala umvwe wasongolwa kwi Lesa, obewa kechi uketekela mu bukata bwa kipwilo kyo mwakonsha kushimika ne, pakuuba mu mulaye awa Yesu Kilishitu ye alaile, amba, “Amiwa yami umotu keesha, leelo, ne myaka yonse.” Mwaketekela kyokyo nyi?

Twayai tukunyike mitwe yetu pa kakimye kacheche.

<sup>170</sup> Nakumya, bufuku buno, mu kishimikwa muno amo bantu mo baikala, amo muji banabalume ne banabakazhi Bapeenape,

bantu babena kuya-Kupeenape, kabiji wayuka mba juba jimo nangwa jikwabo wafwainwa kusambakana Lesa. Kabiji Nakumya kana wajinga na mpemeno icheche ya kavulamy, kabiji amba wafwainwa... Obewa wayukanyikwa mu kintu kyatama, kabiji wafwainwa—wafwainwa kupitulukamo, bufuku buno, ne kumona kana kechi wakonsha kuyukanyikwa mwi Yesu Kilishitu ne? Mwakonsha kusutulako kuboko kwenu, ne kwamba mba, “Ndombeleleko, Mulongo Branham, Na—Nasaka kuyukanyikwa nobe Mwinakilishitu wakine, waitabila wakine.” Lesa emupeshe. Lesa emupeshe. Emupeshe! Oo, ee, kuzhokoloka. Aye Nkambo Lesa emupeshe.

<sup>171</sup> Muntu umo peulu, mwaamba mba, “Mulongo, Naketekela mba abo bo Bukine. Naketekela, nobe Benakilishitu, atweba kechi twi Benakilishitu nobe byo kyaikalanga myaka yapita kunyuma ne.”

<sup>172</sup> Pano nga anweba bantu baki Pentekosito, mu kimye bainenu ne bashenu kyo baimananga pa mukwakwa popa, na kwimba kisekeseke kyakala. Kabiji ne bainenu, byo baubanga... baikalanga bankoka, ne kulwisha ne anweba baana babacheche. Kimye kimo mwaikalanga kwakubula bya kuvwala, ne bintu bikwabo, bino bataata ne bamaama bajinga bakishika ku Mwingilo, mu kulama Kilishitu.

<sup>173</sup> Talai anweba bantu ba Kipentekosito byo mwaubanga. Myaka fifite yapitapo, mwafumine mu tubungwe. Akyo kyo kimulengela anweba kwikala ba Pentekositi, mwiabenye anweba bene ku wabula kwitabila. “Kabiji kijitu pamo nobe kumba wabwela kumateshi anji, kabiji ne kabwa ku malashila anji,” mwabwela lunyuma na kuuba bintu bimo, mwauba bilubo bimo byo mwafuminemo. Lukatazho lwepi? Kavulamy ka kumupashi kamwekele mu bantu. Anweba muji na bisho byenu kabiji ne bipepala byenu bya dinominesheni, kabiji mujitu pamo naabo bashala, mubena kukeba kwikalatu pamo na bashala. Anweba mwaswisha banabakazhi benu kutenda suki yabo, ne kwipeta. Anweba, mwibaswisha kuuba bibye byonse bintu, kuswisha bintu byonse bye mu—mu bipwilo. Kyokika? Kavulamy ka kumupashi.

<sup>174</sup> Nanchi, kintu kitanshi mwayukatu, inge Lesa watatula kupepula bantu, nanchi kika kimweka? Anweba kechi mwakonsha kwikitambula ne. Monai, mwakolwa bingi na koka kavulamy, monai, kyokyoka kintu kyo mwaumvwapo kala. Bushe kechi mwalangulukapo kuleka mafunjisho a bantu pa mamineti acheche ne kutola Baibolo, kabiji ne kumona Mwinakilishitu byo afwainwa kuyukanyikwa? “Abye biyukilo bikebalondelanga baitabila!”

<sup>175</sup> Byubilo, Petelo waambile mba, “Lapilai, anweba bonse, kabiji ne kubatizhiwa mu Jizhina ja Yesu Kilishitu mululekelo lwa mambo, kabiji mukatambula wabupetu Mupashi Wazhila;

mambo mulaye walailwa anweba, ne baana benu, kabiji ne bonse baji kwalepa, ne bonse mo bavujila Nkambo Lesa wetu bo aketa.” Inge be mubuula mba Akyo kechi byokiji ne, nanchi kafunga wenu uji na lukatazho lwabaya lwa kavulamy ka kumupashi. Aye kechi wakonsha kuyukanyikwa aye mwine na kyokya Kipwilo ne; kechi kabungwe ne; ke Kipwilo, Mubiji wafyamika wakwa Kilishitu.

<sup>176</sup> Pano Mupashi Wazhila uji muno. Aye uji pano na kuuba byonka Aye byo alaile kuuba. Pano kimye kyo muji muno na mitwe yenu yakunama, twajijilaitu na kulomba. Lekai Mupashi Wazhila ambe, Ayemwine. Kabiji monai kana kikye. . . Uji yense wayuka kyokyo, mulaye, byo aji wa mu jino juba. Pano anweba muji na byakukabila, bufuku buno, anweba, bavula mwajikusutula maboko enu. Kasa mukyangye kuuba kyokyo. . .

<sup>177</sup> Nakumya, mu kimye kyo tuji pano na kulombelela bakolwa, Nakumya kana mwakonsha kufumako mu kubula luketekelo, aya dinominesheni, alwa lufunjisho lwa bantu lwi mubuula mba kechi byokiji ne, awa wakonsha kwimubuula mba Kyakwa diabola. Umvwe bauba byobyoy, “Abo kechi bakalekelwa mambo ne, mu inontanda nangwatu muntanda ikeya.” Pano ibyepi inge Abwe bo Bukine? Ngilangulukaipot, pano inge byo Kiji, nanchi obewa uji kwepi? Monai, kechi mwafwainwa kwikyamba ne; ketekelaitu mu muchima wenu. Kabiji muji bantu muno baketekela kyokyo. Naikala monka muno, pa mafuku abiji apita, na kwingila na kintu kimo, kubatu, ami, nakwachijijilatu na kusuma pa lujimi, na kukanya kubula kwikitongola.

<sup>178</sup> Kabiji vulukai, mulunda, kiji pakachi kenu ne Lesa. Pano ibyepi umvwe kyatama, kabiji ubena kulanguluka kyokyo? Mwayuka kimweka, obewa kechi ukalekelwa mambo ne. Kavulamya ka kumupashi, obewa ukayangatu mu lufu lobe lwa Peenape, kubula luketekelo. “Aye wabula kwitabila wazhatwa kala!”

<sup>179</sup> Pano lombelelai misongo yenu, ne kwaamba mba, “Nkambo Yesu, Anweba mwalaila. Amiwa. . .”

Kapepo muji benyi muno, abo babula kutanwako kala.

<sup>180</sup> Yesu walaile, “Byonka byo kyajinga,” Amiwa nsakutola Kinembelo kimo, “mu moba akwa Lota,” kimye Lesa kyo amwekele mu mubiji wa nyama ne mashi; kabiji ne bantu, Abulahama, jibumba jasalwa, jibumba ja bantu-baitwa. Kabiji jizhina ja Abulama japipwilwe kwikala Abulahama, pano aye wamwene Kyambo kya alukile ke muntu, kabiji Wayukile milanguluko yajinga mu muchima wakwa Sala.

<sup>181</sup> Kabiji Lukunwa Wazhila wakwa Abulahama byo aishile, abyo byo Aubile, kabiji Bamutelele mba “diabola.”

<sup>182</sup> Aye waambile mba, “Pano umvwe Mupashi Wazhila waiya, ukooba kintu kimo.” Waambile mba, “Kino kimye paji lulekelon lwa mambo umvwe Amiwa watela byobyoy, bino, umvwe waamba

bintu byatama pa Mupashi Wazhila, kechi mujipo lulekelo lwa mambo ne.”

<sup>183</sup> Pano lekai Aye, mu Bulume Bwanji, eye mu jino jibumba ja bantu, konse komuji, kabiji na kuyuka Kwanji kwa mipashi kasa abena kumwasha mba Aye ye Kyambo. Kyakuuba mba inge mujipo bamo muno bamanama na kavulamya, amba abo kechi bakooba. . . bakekala kwakubula mwakubepela, lwito lwa kitapishho kasa lukyangye kwitwa ne.

<sup>184</sup> Lekai aye Nkambo Lesa etukwashe. Pano na mitwe yenu yakunama, na munema lombai.

<sup>185</sup> Monai, kuji inetu waikala papo kulutwe yami. Maboko anji amvweta kilungi kyanji. Aye wakatazhiwa na longololo. Kabiji uji ne nalubazhibazhi. Uji na lukatazho lwa munda. Kabiji waikala muno kulutwe yami. Kabiji aye wafwainwa kuyuka, kechi wafuma mu kino kyaalo ne. Aye wafuma mu muzhi watelwa mba Mecon. Ee. Mwaketekela mba Lesa wakonsha nkumbula byo uji nyi? Obewa wi Miss Ayers. Inge abyoy ibyo, sutulai kuboko kwenu. Amiwa ne mwenyi kwi obewa. Akyo kine, kechi ibyo nenyi? Pano lukatazho lobe lwapwa. Yesu Kilishitu; wajikukwata kyakumvwala Kyanji. Aye wakulenga kwikala mututulu. Pano kiketekelaitu.

<sup>186</sup> Kuji mwanamulume waikala kunyuma ya kishimikwa. Aye ubena kukeba lubatizhilo lwa Mupashi Wazhila. Aye ukeba lubatizhilo lwa Mupashi. Aye waimana kuno kulutwe yami. Aye kechi wakuno ne, ne aye. Aye wafuma ku Carolina, Charlotte. Lepoe jo jizhina janji. Ketekelai na muchima wenu yense, kabiji Lesa ukemuyuzha na Mupashi Wazhila, wami—mulongo wami, inge mwakonsha kwiketekela.

<sup>187</sup> Kuno, kukilujo kyami, kuji mwa—mwanamulume ne mukazhanji baikala palutwe yami. Ke masongola akala, ku kilujo kyami. Aye inetu wakatazhiwa na lukatazho lwamula. Mulume wanjji uji na lukatazho lwa muchima. Kechi bafuma muno ne. Bafuma ku Tennessee. Mr. ne Mrs. Thomas, inge mwakonsha kuketekela na muchima wenu yense, sutulaiko maboko enu kabiji mwakonsha kuswa lubuko lwenu. Yesu Kilishitu wimulenga kwikala bulongo. Abyo kine Aye byo alaile kuuba. Bino Amiwa kechi nakibamonapo abo bantu mu bumi bwami ne.

Kavulamya ka kumupashi!

<sup>188</sup> Yesu waambile mba, “Mingilo yo Nguba ne anweba mukeyuba. Pa kakimye kacheche, kabiji ba panopantanda kechi bankamona Amiwa jikwabo ne; nangwa byonkabyo anweba mu Kamona, mambo Amiwa,” ke ng’ambilo ya kutazha kumuntu, “kikekala ne anweba, ne mwi anweba, kufika ne kumpelo ya ntanda.” “Yesu Kilishitu ujitu pamo keesha, leelo, ne myaka yonse.”

189 Pano, ku banabalume ne banabakazhi baji muno, abo baji na kintu kimo kyangama ne abo, kyakuuba mba kechi mwakonsha kumona. . . Obewa, obewa wakeba kuketekela, bino anweba kechi mwakonsha kutwelamotu ne, kabiji anweba mubena kukeba kulombelelwa, obewa wafwainwa kumutambula Aye kimye kyo muji mu Kyenye Kyanji, mwakonsha kwiya na kwimana kulubaji lwami, pakuuba mba ne mulombelele kabiji mbike maboko ami pe anweba. Inge mwakonsha kwiya ponka ponji, anweba mwakatazhiwa byobyo, na kavulama ka kumupashi, kabiji mwakeba kulombelelwa, pakuuba mba mukasuluke kukyokyo. Inge kechi uji—kechi waitabila ne, bino ukeba kulombelelwa, iya kuno wimane. Lesa akupeshe, mwanamulume wakyanyike. Muntu mukwabo eye? Lesa akupeshe, inetu. Iyai. Lesa akupeshe, inetu wakyanyike. Muntu mukwabo eye? Iyai, mwimane kuno, ponka pano.

190 Kavulama ka kumupashi, Amiwa kechi nakeba kukwatwa na yuwe mwalo ne. Lesa kechi ekiswishe ne. Lekai ami—lekai ami mfwe lufu lwa—lwa kintu kiji kyonse ne, bino kechi mundeke amiwa kufwa nobe wabula kwitabila ne.

191 Iyai, mumutambule Aye pankapano. Kechi mwakonsha kwikyuba nenyi? Fumaipo, kabiji yikilai pakibamba kyapeulu, balunda. Ke tampulo ichechetu papo, kabiji yakonsha kulumbulula pakachi ka lufu ne Bumi, kwi obewa.

192 Talai, Amiwa kechi nakonsha kulenga Kilishitu kuuba kintu nangwa kimo ne. Kilishitu kechi wakonsha kubapo kiji kyonse ne kanatu kintu kimo: Aye wafwainwa kulama Kyambo Kyanji. Aye wafwainwa kuuba kyokyo pakuuba mba ekale Kilishitu, ekale ke Lesa. Aye wafwainwa kulama Kyambo Kyanji.

193 Pano vulukai, inge kechi washiniinwa na kyakupitamo kyobe ne, kika kyakubula kwiya pakino kimye. Inge obewa wiwa ku dinominesheni, inge obewa wimunkana wa ki Pentekosito, Lesa kechi ujipo na bankana ne. Aye uji na baana babalume ne babakazhi, bino kafwako bankana babamulume ne -babakazhi. Mwamona? Lesa kechi uji na byobyo ne. Aye ujitu na baana babalume ne babakazhi, kabiji wayuka mba kechi byo uji ne.

194 Kapepo waambapo na jimi, kapepo wazhile, wafwaijilwe kuuba byonse *bye*. Akyo kijitu bulongo. Amiwa kechi jipo na kintu kimo nakyokyo ne. Pakuuba inge obewa ukiji na kavulama ka kumupashi, kukuluka, kabiji iya kuno wimane kuno. Twayai tulombelepo pa kikye. Ubena kwaamba mbaka? Membela wa kipwilo, ke—ke membalatu wa kipwilo, kika kyo wabujila kwiya kuno ne kukasuluka ku kyokyo ponkapano?

195 Amiwa kechi mbena kukeba kusha Birmingham kuno ne, kabiji uyuke mba juba jimo, Buchibishi bwamambo byo bukeya, kabiji Amiwa nkemana ku meso enu. . . Vulukai, Amiwa kemukumanya jibiji. Inge Nabula kwimukumanya kuno ne,

nangwa Amiwa kemukumanya pa Buchibishi bwa mambo kabiji Nafwainwa kukumbula pa byo Naamba bufuku buno.

<sup>196</sup> Pano telekai. Lapilai, balunda! Lapilai, fumaimo mu kikye. Mfumai mukyokyo. Iyai pano.

<sup>197</sup> Akyo kyakonsha kulengela yense mwanamukazhi waichika-suki mu kino kyaalo, nangwa pa ino mpuzha, iyai kuno pakyoka kino kimye. Abyo kine ibyo. Akyo, obewa kechi uji na bupe bwavula bwakwamba mba, “Na—Na—Na—Nasaka kuuba, Nasaka kuleka suki yami ikome, Mulongo Branham.” Kyafwainwa . . . “Amiwa njina . . . Kyawama, Amiwa kechi nji na lusa lwa kwikyuba ne.”

Kika, mwamba mba, “Bushe akyo kiji na kintu kimo kyakwingila nakyo nyi?”

<sup>198</sup> Kuno kechi papita kimye kyabaya ne, wamwingilo mukatampe waishile kwi amiwa, ne kwaamba mba, “Nasaka kubika maboko pe obewa, Mulongo Branham.” Waambile mba, “Muntu yense ukumona mba wi ngauzhi.”

Naambile mba, “Amiwa kechi naambapo mba Amiwa ne ngauzhi ne.”

<sup>199</sup> Aye waambile mba, “Pakuuba bantu bakumona byobyoyo. Kimye kyonse mubena kwibataula banabakazhi, na mambo akumvwala tuputula,” kabiji—kabiji, oo, mwanamulume waki Pentekosito. Kabiji waambile mba, “Pa bya kumvwala tuputula, ne kutenda suki yabo, ne bintu bikwabo.” Waambile mba, “Awo kechi ke mwingilo obe ne.”

Naambile mba, “Mwingilo wabang’anyi nanchi?”

<sup>200</sup> Kabiji aye waambile mba, “Abo bantu, kika kyo ubujila kwibafunjisha banabakazhi kwikala, na byabupe bya bumupashi, kabiji ne kukwasha bantu, mukifulo kya kweseka ku . . .” Waambile mba, “Bakumona obewa. Byo wibabuula, bakonsha kukuketekela.” Waambile mba, “Kika kyo ubujila kwibabuula bya kutambula byabupe ne bya kukwasha bantu, mukifulo kya kuuba mba kimye kyonse wibazhachishatu?”

<sup>201</sup> Naambile mba, “Nakonsha kwibafunjisha byepi samushi kasa babula kuyuka ne ABC’s wabo?” Mwamona? Mwamona?

<sup>202</sup> Wafwainwa kutatwila panshi, lapilai nangwa konaika! Pano wakonsha kufikilamo obewa mwine, lapilai nangwa konaika! Yesu Kilishitu wimweshwa bulongo Aye mwine muno, bufuku pa bufuku. Kabiji abwe bo bufuku bo twapana ku lupulukilo. Kijitu patampulo icheche papo, kabiji Njina kimye kyabaya bingi kyakupembelela.

<sup>203</sup> Vulukai, Birmingham, mashi enu kechi aji pe amiwa ne. Amiwa kechi jipo na mambo ne. Kabiji umvwe kine uji na Mupashi Wazhila, uji na jishuko ja kwiya pa kino kimye. Kabiji ingde ubena kukatazhiwa na kintu kiji nobe musango-wabu kipwilo akyo kyakulengela kwikala na kavulamya ka

kumupashi, kika kyo wabujila kwiya? Yesu ye muchi. Kechi wakonsha kwiya nenyi?

<sup>204</sup> Pano bantu bamo bafuma pa kibamba kyaapeulu. Najikupembelelanga kumona pepi pobaji, kulupuka nangwa kwiya kukitapisho. Abo papo, iyai kuno muzhokoloke. Abyo ibyo. Anweba muji muno, iyai kuno ku kitapisho, ne kwamba mba, “Amiwa napwisha kikye.” Ee, baishilenga, bainetu babiji. Akyo kyawama.

<sup>205</sup> Iyai kuno pakino kimye. Tampulo ichechetu. Kabiji ayo tampulo yafwainwa kuleta lupusano.

<sup>206</sup> Pano, talai, Nasaka kwimwipuzhako kintu kimo. Ibyepi inge Aye waiya bufuku buno? “Oo,” amba, “Aye kechi ubena kwiya ne.” Amiwa kechi nayuka ne kana Aye byoaji nangwa ine. Akye kyo kiyukilo kyapelako. Vulukai, ABYO BYOBYAAMBA AYE NKAMBO! Bushe mwaking’umvwapo kala byobyonyi kanatu kyajinga kya kine? Anweba mubena kumona kiyukilo kyenu kyapelako. Akyo ke Kyanembwa. Mwamona kiyukilo kyenu kyapelako, Pentekositi. Kechi muvwangakanye pamo na byo Alaile Isalela panyuma ya Kushikulwa ne; abyonyi kechi anweba ne. Anweba byapwa, nanchi. Mwamona? Pano jino jo juba jenu. Kino kyo kiyukilo kyobe. Kino kyo kimye kyenu. Kechi Mwikikane ne. Kwikyuba byobyonyi ne. Mwafwainwatu anweba kwiya. Anweba mwaketekela mba amiwa ne kalume wakwa Lesa nyi? Vulukai.

<sup>207</sup> Birmingham, Amiwa kechi na kikumanyapo bantu bawama ne. Anweba mwi bantu bakila bingi kuwama bo Nakonsha kukeba kukumanya mu bumi bwami, bino anweba mubena kukeba kusangululwa. Anweba mubena kufwa. Obewa ubena kutola kavulamyaka kumupashi. Obewa ubena kufwa. Kechi ube kyokyo ne. Sangululai kyokya kyo uji nayo. Kibushai ne jikwabo, bukiji bukiji, Yesu kasa akyangye kwiya.

<sup>208</sup> Kijitu bulongo, kimye kyo... Twajijilaitu na kwiya. Balekaitu batwajijile na kwiya poso tusende bonse, abo Nkambo bo abena kwita, kwiya kuno. Iyai pano.

<sup>209</sup> Mfumyaipo aka kavulamyaka. Ng’anga mukatampe uji pano na kubuka kyokya, kifumyaipo pe anweba. Aye washiniikisha mba Uji muno. Baanga bakonsha kuyukanyikwa na kyokyo, kupichila mu kwimanya kuboko kwenu, ambai mba, “Amiwa kine nekiketekela; amba Aye wakonsha kuuba kikye?” Mwamona? Pano Aye uji muno. Mwamona? Mwamona? Mwaketekela.

<sup>210</sup> Kabiji baanga bayuka mba Mbena kwimubula bukine, amba obewa ubena kufwa kabiji ubena kukebewa kusangululwa? Mwamona? Ke bukine.

<sup>211</sup> Anweba mwi bantu bawama bingi. Anweba kechi mwakonsha kutana bakila kuwama ne. Kechi kujipo michima yawama yakokomana ne, kukila baji mu malaya a ku Kebeta



kabulenge kuno. Abyo ibyo, bantu balumbuluka! Bino, balunda, mwafwainwa kubuka, bukiji bukiji! Mu kimye kyo mwabula kulanguluka ne, kyakonsha kumweka. Kechi kyakonsha kumweka ne; Amiwa kechi nayuka ne.

<sup>212</sup> Bino, vulukai, anweba mubena kutambula lujimuno lwenu lwapelako, nanchi nyemai kimye kyo mukiji na kimye kya kunyema. Iyai pano. Kikulutu babena kwiya, Amiwa mbena kupembelela, mambo kwafwainwa kwikala...Mweo umo wanema byaalo teni sauzande. Kabiji kikulu bantu babena kushiininwa... .

<sup>213</sup> Nakonsha kutemwa akye kyatwela mukusanguluka kwabaya bingi kwakonsha kulengela kipwilo kiji kuno; inge mwakonsha kufumyapo lupusano lwenu lonse kabiji ne kwitemwa kwenu konse, ne kutambula Mupashi Wazhila. Anweba mwamba mba Mwamuketekela. Anweba mwaamba mba Mwamuketekela, kabiji, umvwe Waiya na kwimwesa Ayemwine, nishi anweba mukendosa umo ku mukwabo. Kika kyakubula kukwatakana na michima yetu na Kyambo kya Lesa ne kuketekela Bukine? Akyo kyokika. Anweba mukatwajijilat na kufwa, na kufwa, kabiji mubena kutwajijilat na kuya mu Laodikeya. Kine Aye byonka byo alaile, Kikekala muyewa musango. Kechi mwakonsha kwiya pano nenyi? Pano jo juba. Pano ke kimye kya kwitabilwa. Monai Mupashi Wazhila byo akonsha kuuba.

<sup>214</sup> Pano Nakeba bonse bamwingilo muno, abo batako muchima kubabo bantu, iyai tulombele pamo, ne amiwa. Iyai kuno, bonse bamwingilo bantako muchima ku baabo bantu. Iyai, iyaitu nakuzhokoloka, ne kutwela mukachi ka bantu, wamwingilo nangwa wa mwingilo obe, wa mwingilo wawamya, mwanamukazhi wafwainwa kukeba kwimana nabaabo banabakazhi pano. Amiwa mbena kuketekela, na muchima wami yense, amba Mupashi Wazhila usa kwiya mu kino kifulo ponka pano kabiji ne kwimwesa Ayemwine mukachi ka baabo bantu.

<sup>215</sup> Pano lekai mbule babo bantu kuno, patanshi. Bino, balunda, kyonse kyo waendela kuno, Aye wayuka. Kabiji Nakonsha kushinikisha kwi anweba, Kikasendatu, umo umo, usakwimuleta kuno ku pulatifomu, kabiji kechi kusakwikalapo kintu kimo kyo Akonsha kubula kuyukisha bantu ne. Pano akyo kyatatwiletu kufuma kimye kyo Najinga nsongwalume mucheche. Akyo kya bupe kechi kiji mu jipuzho ne. Pakuuba jipuzho ke jino, wakonsha kwikitambula nyi? Mwikiketekela nyi? Pano Aye uji pano. Kyawama, inge Aye uji pano, nanchi kujitu kintu kimo, Aye ulama Kyambo Kyanji. Pano ketekelaitu mba anweba mwikitambula, kabiji ne kwikiswa, kabiji sutulaiko ne kwamba mba, "Nkambo Lesa, Amiwa njipano na kwikiswa," kabiji ikalatu popa poso kyamweka.

216 Nobe Buddy Robinson waambile kimye kimo, mu bujimi bwa mataba. Aye waambile mba, “Nkambo, inge Anweba kechi mwakonsha kuupa Mupashi Wazhila ne, byo mukabwela Anweba mukatanatu mulumba wa bikupa kasa alala ponkapo.” Aye wafwile na kukabila. Kabiji kechi wakonsha kutambula kintu kwi Lesa ne kanatu waikala na kijikila kyabaya.

217 Bushe, anweba mwamona kijimwa kya leelo, bushe mwamona leelo byo tuba nyi? Atweba, kine, tuji na Lesa wafikilamo mwi atweba poso twaiya ku pulatifomu, twaamba mba, “Ee, kape Kyawama naiya.” Pano akye kyo kyakupitamo kya ntanda yonse. “Ee, Kyawama naya na kwimana.” Ne kwamba mba, “Kyawama, kyawama, Amiwa kechi nayuka ne. Amiwa Njipano, mwamona.” Hum! Ng’anyi mpuzha ya kwikalamo! Kechi kujipo mujilo ubena kutema ne. Kechi mujipo lutundaiko ne. Kechi kujipo “kuya mwi Akyo ne!” Kabiji, nobe musapwishi, akyo kingipayatu pa kumona bantu bakwa Lesa muyewa musango. Twafwainwa kwikala mujilo.

218 Pano, mwamona, kyo kika? Kine kiji byonka byo Nemubujile. Lumwekesho 3, “Obewa wi kyambazhi. Kabiji,” Aye waambile mba, “mambo obewa wi kyambazhi, nanchi Amiwa kakulasamo mukanwa Kami.” Abyo ibyo? Abyo byo Aambile. Kabiji, inge Aye waambile byobyoy, abyoy byo Akooba. Nanchi kechi twikale bu jibumba ne.

219 Anweba muji muno, mwakajilwa. Twayai Twikitambule, nangwa kufwa, ponka pano. Abyo ibyo. Twayai Twikitambule, nangwa kufwa.

220 Pano, mulongo wami mutemwe, nyenga, inge Nakonsha kwiya na kukwashako kintu kimo, Nakonsha kwikyuba. Pano, na kyabupe, Nakonsha kukubula kyo waishila kuno. Nakonsha kwimubula byokiji, na Mupashi Wazhila, na Mupashi wa kwa Lesa, kwimubula kyo mwaishila kuno, ne byo mwauba, byo kikekala kulutwe, nangwa kintu kimo kiji byobyoy; pakuuba akyo kechi kyakonsha kwilama akyo kine ne. Obewa wafwainwa kuswa Kikye, obewa mwine. Kyafwainwa kwikala obewa!

221 Pano mwinengezha nyi? Sutulaiko kuboko kwenu, ne kwamba mba, “Amiwa nenengezha. Amiwa nenengezha kufwila ponka pano.” Pano kechi wakonsha kwikyuba ne kana washinikisha. “Amiwa nenengezha kufwa konka kuno, nangwa kutambula kyo Mbena kukeba kufuma kwi Lesa.” Amena. Mwinengezha kine nyi?

222 Nanchi lekai jibumba jimane, konse konse. Pano bonse pamo, pamo, twayai tukwatakane atweba bene. Twayai tulombe. Kabiji twayaitu. . . Anweba bamingilo yai ponkapano ku babo bantu, bonsetu, kabiji obewa anweba mwaimenako maboko akwa Kilishitu ponkapano.

223 Anweba mubena kukeba Mupashi Wazhila, anweba mubena kukeba kyakupitamo, kechi kiji na ng’umvwino ya ku mubiji

ne; mubena kukeba Mupashi Wazhila, Bumi, kakishi ka Bumi mukachi kenu. Kabiji mubena kukeba kufumyapo aka kavulamyia ke mulengela anweba—anweba kukakalwa kwiyuka anweba bene; obewa kechi wayuka po waimana ne; obewa kechi wayuka byo uji ne; twayai twikifumyepo ponkapano! Kuji Kusemwa kupya nkobe, kwa kine, Kusemwa kwakine.

<sup>224</sup> Pano twayai tubike maboko etu pa baabo bantu. Twayai, muntu yense, tusutuleko maboko etu ne kulomba na muchima umo.

<sup>225</sup> Taata Wamwiulu, mu Jizhina ja Nkambo Yesu, swishai, Nkambo, kyokyo mu Jizhina ja Yesu Kilishitu, amba Mupashi Wazhila usakwiya bufuku buno, kino Kibelushi bufuku, apo Mupashi Wazhila po aponene nobe mwela mukatampe. Lekai abo bantu babatizhiwe mu Mupashi Wazhila. Lekai Mujilo ne Bulume bwakwa Lesa kufumapo pe abo ne. Inge baji muno mu lukeelo, lekai bekale, bekale poso Mupashi Wazhila waiya.

<sup>226</sup> Ao ye mwine mulanguluko! Byokiji! Abyo byo Kiji. Awo ke Mupashi Wazhila ubena kwiya. (Amiwa ne kyuba ne kyuba. Nayuka kyokyo.)

Byo byonka. Kiketekelai Anweba pano! Kitabai Anweba! Yulwaimo na mapesho Anji. 🐦

64-0411 Kavulamy ka Kumupashi  
National Guard Armory  
Birmingham, Alabama U.S.A.

KAONDE

©2024 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Kayukilo ka kuvuzha

Luusa lonse luji kubene. Awe buuku mwakonsha ku mupulita ku kya kupulitako kya pa nzubo pakuuba mba anweba bene mwakonsha kumwingijisha nangwa kupaanwa, kyatuutu, nobe jishinda ja kunsampwilamo Mambo awama a Yesu Kilishitu. Awe buuku kechi wakupotesha ne, kulengamo avula, kutumwa palubesha, kufiwa mu makopyuta, kututululwa mu milaka ikwabo ne, nangwa kwingijisha mukumwenamo mali kwakubula kuswisha kwanembwa kufuma kuba Voice Of God Recordings®.

Pakukeba kuyukilapo bikwabo nangwatu mabuuku akwabo, mwane tumai pa:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)